

四庫全書

子部

欽定四庫全書

子部
古儷府卷六

詳校官中書臣金應琦

主事臣祁韻士覆勘

總校官中書臣朱 鈐

校對官中書臣王家賓

謄錄監生臣章玉植

欽定四庫全書

古儷府卷六

明 王志慶 編

職官部三公

宋李綱宰相除三公制 臣作朕股肱擢預經綸之政
帝養子良弼遂膺考爰之求勸相國家教寧方夏變諧
四氣之序參聽百官之成當軸處中材足以運動樞極
贊元經體道足以和同天人禮樂興於百年聲教訖於

四海俾予從欲以治時乃佐王之休疇其勲庸宜有褒寵

齊孔稚珪爲王敬則讓司空表 先帝擢臣以榮華陞下伸臣以富貴遂行北帶五州東跨六郡內亞三鼎外齊四嶽蟬佩之暎則左右交暉龜組之華則縱橫吐耀輕輪徐動則劔戟如雲飛蓋暫停則歌鐘成列擬金龍吹鬱其前鳴笳鳳管壘其後鄧禹若不遭漢光則南陽之掾吏微臣若不逢明聖則孤城之戍客豈可加以正

台之席登以論道之寄啟黃扉而變五緯躡青帷而調
四序

梁劉孝儀爲臨川王解司空表 臣以庸薄謬竊隆重

職班三事任總六條衣袞坐槐既闕論道馳傳懇棠尤
慚爲政而俯司土地仰變陰陽棟撓之譏已彰愆伏之
咎爰著今水沴乃作旱魃爲災山無蒼蔚雲成煙火陞
下曲私未垂策免臣職是當逃責乞降茲台步協此天
人

陳沈炯爲陳太傅讓表 若使幅巾衡巷口絕平吳朝
遊赤松暮過濟北出就侯服入褫龍章則四郊有壘誰
守社稷如其雄戟在前強弩自衛負孺子之圖飾緣鶴
之鼎軍威重於護將國禮貴於寒門則臣道尚早孰云
非逼

吳均揚州建安王讓知司徒表 臣聞玄黃之馬事絕
於銜鑣蠹朽之材飾垂於丹漆何則千里之志已窮萬
乘之器無取遠物近身於馬在譬

後魏溫子昇爲司徒高敖曹謝表 委水橫流羣龍交
戰徒悲道喪空懷主辱雖復見義援戈臨危奮劍顧慚
後血終謝先鞭事等泣河無救三川之竭有類憂天豈
支四極之壞

宋李劉賀史丞相除太傅啟 竊以傅者傅之德義不惟
其官惟其人臣哉臣作股肱罕有是父有是子若西京
厚王陵之寵及東都旌卓茂之年雖加衡統以鞶纓俱
匪箕裘之鼎鼐於皇孝廟舊學越倫當淳熙丙午之壽

上皇以正月戊子而進亞父今專槐之正位有喬木之
世臣父子一家兩兩齊三台之色君臣千載重重聚四
紀之間賁然綠綈之新復此青氈之舊 風震雨凌而
棟梁自若火炎水潤而鼎寶各調蓋享天心非要人爵
陶侃之指紋貫徹猶三遜以滋高丁固之松夢留連甘
十年之不調上念慈闈之訓日思元老之功無官酬公
維師尚父猶堅謙抑力反渙揚姑隆絕席之班式舉戴
輿之典虹明帶玉龜顧印金備袞冕之上儀增衣冠之

盛事改容而禮論道以經平淮用八千兵更酬謝傅蒼
生之志辭齊封三萬戶會尋留侯黃石之盟

蘇軾賀文太尉啟 道本天合德爲人師信及二川之

豚魚威加兩河之草木身任休戚言爲重輕始若留侯
弱冠而遇高祖晚同尚父黃髮而亮武王既奉冊書益
新民聽方將威懷北敵係頸長纓約東河工軌流故道
然後入調伊傅之鼎歸躡松喬之游輿論所期斯言可

必

周王褒太傅燕文公于謹碑銘 公稟山岳之上靈含

風雲之秀氣雕良玉於廉劔鍊貞金於鎔鎔 魏恭帝

元年爲大司寇正刑糾慝國無害馬之倫翦暴詰姦民

無飲羊之俗三刺薦無簡之文兩造陳禁邪之憲 世

爲邊將少習兵書當敵制機臨戎應變增壘減竈之圖

題樹繫桑之畧軍中罷戰無廢雅歌壯士志驕時觀投

石及乎名高衛霍爵重韓彭錫邑增於鄭僑賜樂同於

魏絳丹節比司隸之貴緹騎埒金吾之寵座闕倡歌之

娛堂無鐘鼓之奏辭功坐樹不伐征西之勲還第角巾
無競龍驤之賞

王褒太保吳武公尉遲綱碑銘 公命世挺生應期

間出嵩華峻極降惟岳之上靈霜露所均體中和之秀
氣危松擢本且觀後雕之質貞桂挺生便體冬華之秀
是故以辰昴膺慶風雲玄感者焉公柔順內凝英華外
發斧藻仁義珪璋令範危勁之節冠四序而喻秀堅貞
之操經百鍊而不銷加以達門射法遠中戟支養由箭

神遙穿懸葉巧極將軍之伎精窮校尉之官

後漢蔡邕太尉李咸碑銘 天垂三台地應五岳降生

我公應鼎之足奕世載德名昭圖錄既文且武桓桓紹
續外則折衝內則大麓

梁沈約齊太尉王儉碑銘 瞻旦奭而齊軫軼夔龍而
長驚百辟翹首譬列星之仰望舒千里結轍若派流之
宗江漢及宋道盛運鼎命將改而瞻烏所集未知適歸
公高卧閒宇獨啖虛室眷龍顏以託夢詠日角以興言

佇傳巖之下懷滋水之上慨深版蕩念在濡足霸君亦
慮屬一匡情降三顧卜匪熊羆唯人是與公深覩興廢
妙識人英察榮光於河渚攀龍翼於雲漢傾方寸以奉
國忘七尺以事君殊文共會異軫同歸堆案盈几充庭
滿室隨方引應斷決如流辭不輟響紙無停筆精明外
朗神彩傍映矚矚接其光景風雲溢乎帷席

後魏溫子昇西河王謝太尉表 臣聞拂羽決起力謝
摩天策蹇載馳功微送日將短翮難以陵高駕乘無由

致遠雖復建旗出郡未追楚趙之風捧壺入侍徒踵金
張之迹及天祚明德運啟興王六遂始遷九鼎初定於
焉承乏有用當官草靡從風未遑克讓常恐執轡輕輪
操刀傷錦

宋傅亮司徒劉穆之碑 飛雲西泝則水絕鯨鯢東轅
東指則陸殫長虵

陳徐陵司空章昭達墓誌銘 周原膾膾佳氣葱葱王
業攸興帝圖斯盛在昔光武佐命鄴縣者鄧侯高祖元

臣同郡者蕭相公台輔之量便著綺紈瑚璉之姿無待
雕琢起家爲東宮直前所奉之君則梁簡文皇帝既而
黑山巨盜憑陵上國白水彊胡虔劉中夏公傾其產業
募是驍雄思報皇儲累殲鯨寇屬幽風有象代邸方降
搜荆楚之英才資班輸之妙畧百樓忽起登雲霄而俯
臨萬弩俱張隨雷霆而並震揚兵於九天之上決勝於
千里之中殪彼羣兇皆無旋踵陳寶應至懷反叛客引
周迪資其食力更事窺窬公奉詔崇朝飲水將力前茅

後勁步驟奔馳仍向甌閩珍其巢窟若夫鳴虵之洞深
谷隱於蒼天飛猿之嶺喬樹參於雲日宜越艇而登嶠
蒙燕犀而涉江威力紛紜震山風海於是咸俘僞師悉
據高墉爰泊滄溟莫不懲乂既而齊人無信將謀郢藩
鬪艦戈船窺江淹漢公纔聞羽檄遽稟師期馳襲荊郢
應時燒蕩方欲宣威瀧沂大討梁華屬上將之韜光逢
中台之掩曜大建三年薨於軍幕爾乃青烏栖霞白鶴
標墳林有逃車樹同華蓋前旂熊軾後乘龍韞介士發

三河之民哀銑同駟馬之曲長安傳生恩禮盛於西京
襄陽墮淚悲痛喧於南峴

職官部 政府

唐張九齡酌宋使君見贈詩 時來不自意宿昔謬樞衡
翼聖負明主妨賢愧友生罷歸猶右職待罪尚南荆政
有留棠舊風因繼組成高軒問疾苦蒸庶荷仁明衰廢
時所薄祇言僚故情

高適古樂府飛龍曲留上陳左相詩 德以精靈降時

膺夢寐求蒼生謝安石天子富民侯樽俎資高論巖廊

揖大猷卿才傳世業相府盛嘉謀豁達雲開景清明月

映秋能爲吉甫頌更忝子房籌戶牖思攀陟門欄尚阻

脩高山不易仰大匠本難投迹向松喬合心緣啟沃留

公才山吏部書癖杜荊州幸沐千年聖何辭一尉休折

腰知寵辱迴首見沉浮天地莊生馬江湖范蠡舟逍遙

堪自樂浩蕩信無憂去矣從黃綬歸歟任白頭風塵與

霄漢瞻望日悠悠

高適奉贈李右相林甫詩 風俗登淳古君臣揖大庭

深沈謀九德密勿契千齡獨立調元氣清心豁宵冥本
枝連帝系長策冠生靈傅說明殷道蕭何律漢刑鈞衡
持國柄柱石總朝經隱軫江山藻氛氲鼎彝銘興中皆
白雪身外盡丹青江海呼窮鳥詩書問聚螢吹噓成羽
翼提握動芳馨倚伏悲還笑昇沈醉復醒思榮初就列
含育忝宵形有竊丘山惠無時枕席寧壯心瞻落景生
事感流萍莫以才難用終期善易聽未爲門下客徒謝

少微星

杜甫投贈韋左相詩 鳳歷軒轅紀龍飛四十春八荒
開壽域一氣轉鴻鈞霖雨思賢佐丹青憶舊臣應圖求
駿馬驚代得麒麟沙汰江湖濁調和鼎鼐新韋賢初相
漢范叔已歸秦盛業今如此傳經固絕倫豫章深出地
滄海濶無津北斗思喉舌東方領縉紳持衡留藻鑑聽
履上星辰獨步才超古餘波德照隣聰明過管輅尺牘
倒陳遵豈是池中物由來席上珍廟堂知至理風俗盡

還淳才傑俱登用，愚蒙但隱淪。
長卿多病久，子夏索居頻。
回首驅流俗，生涯似衆人。
巫咸不可問，鄒魯莫容身。
感激時將晚，蒼茫興有神。
爲君歌此曲，涕淚在衣巾。

杜甫贈韋左丞丈濟詩
左轄頻虛位，今年得舊儒。

相門韋氏在，經術漢官須。
時議歸前列，天倫恨莫俱。
鵠原荒宿草，鳳沼接亨衢。
有客雖安命，衰容豈壯夫。
家人憂几杖，甲子混泥塗。
不謂矜餘力，還來謁大巫。
歲寒仍顧遇，日暮且踟蹰。
老驥思千里，飢鷹待一呼。
君能微感激

亦足慰榛蕪

劉禹錫奉賀吏部尚書太常李卿二相公策免後即事

述懷贈答詩 文雅關西族衣冠趙北都有聲真漢相

無類勝隨珠當軸龍爲友臨池鳳不孤九天開內殿百

辟看晨趨誠滿懋欵噐成功別大壚餘芳在公論積慶

是神扶步武離台席徊翔集帝梧銓材秉秦鏡典樂去

齊竽瀟灑風塵外逢迎詩酒徒唯應待華皓更食萬錢

厨

白居易寄獻北都留守裴令公詩 天上中台正人間

一品高休明值克舜勲業過蕭曹始擅文三捷終兼武

六韜動人名赫赫憂國意怱怱伐蔡擒封豕平齊斬巨

鼇兩河收土宇四海定波濤寵重移宮籥恩新換閭旄

保釐東宅靜守護北門牢晉國封疆潤并州士馬豪胡

兵驚赤幟邊雁避烏號令下流如水仁沾澤似膏路喧

歌五袴軍醉感單醪將校森貔武賓僚儼雋髦客無煩

夜柝吏不犯秋毫神在臺駘助魂亡獫狁逃德星銷彗

宇霖雨滅腥臊烽戍高臨代關河遠控洮汾雲時漠漠
朔吹冷颼颼豹尾交牙戟虬髯捧佩刀通天白犀帶照
地紫麟袍羌管吹楊柳燕姬酌蒲萄銀合鑿落線金屑
琵琶槽遙想從軍樂應忘報國勞紫微留北闕綠野寄
東臯忽憶前時會多慙下客叨清宵陪讌話美景從遊
遨花月還同賞琴詩雅自操朱絃拂宮徵洪筆振風騷
近竹開方丈依林架桔槔春池八九曲畫舫兩三艘徑
滑苔粘屐潭深水沒篙綠絲縈岸柳紅粉映樓枕爲穆

先陳醴招劉共藉糟舞環金翡翠歌頸玉螿螬盛德終
難退明時豈易遭公雖慕張范帝未捨伊臯眷戀心方
結踟躕首已搔鸞凰上寥廓燕雀住蓬蒿欲獻文狂簡
徒煩思鬱陶可憐四百字輕重抵鴻毛

姚合奉寄東都留守令狐相公詩 除書東守洛陽宮

恩比藩方任更雄拜表出時傳七刻排班衙日有三公
旌旗嚴重臨關外侍府清深接禁中三十六峰詩酒思
朝朝閒望與誰同

項斯獻令狐相公時相公郊壇行事迴詩 鴉在卿雲
冰在壺代天才業本訐謨榮同伊陟傳朱戶秀比玉商
八畫圖昨夜星辰回劔履前年風月滿江湖不知機務
時多暇還許詩家屬和無

李洞述懷獻單相公詩 帝夢求良弼生身屬聖明青
雲縣器業白日貫忠貞靄靄隨春動忻忻共物榮靜宜
浮競息坐覺好風生萬國惟應躍千門望盡傾瑞含揚
柳色氣變管絃聲百辟尋知度三階正有程魯儒視蘊

藉周誥美和平碧水遺幽抱朱絲寄遠情風流秦印綬
儀表漢公卿忠讜期登用回邪自震驚雲開長劍倚路
絕一峯橫九野方無事滄溟本不爭國將身共許心與
衆爲城早晚中條下煙塵一顧清南潭容伴鶴西笑忽
遷鶯折樹恩難報懷仁命甚輕二年猶困辱百口望經
營未任英侯選空勞短羽征知音初相國從此免長鳴
唐沈詢魏謨拜相制 風后登庸軒圖以穆文終佐理
漢業遂昌 自騰芳詞林振跡諫垣文宗知臣深加寵

遇檢校甚峻守道不回未至達官爵爲國器星霜屢變
流落幾途秀木摧風燎原見玉汲黯心存乎廊廟望之
志在於本朝 昔爾先祖爲唐輔臣人鏡之名阿衡比
德爾尚纂承藝訓克嗣清風勉思貽厥之謀以闡將明
之業

玉堂遺範張弘靖拜相制 實天生德惟嶽降神端方
靜深信厚溫密質抱荆山之璞光含魏國之寶錯爾素
履穆然清風出備爪牙總近關之紀律入膺喉舌練中

臺之法制從容宰輔密勿鼎司

又王涯拜相制 屬者禁垣揮翰五字日宣選部持衡
九流風動洊居肘腋之地歷試股肱之才進嘗伏於青
蒲出不洩其溫樹牟融得大臣之節毛玠有古人之風
詢廟算以生知論兵鈴而暗合

又權德輿拜相制 騏驎之質常識於遠途鸞鳳之姿
宜巢於阿閣期於致理推之至公

又夏侯孜拜相制 篙檝克修航艦以之濟海羽翮可

勵鷗鵬於是摩天 大鼎分精維嵩挺秀擅四海之賢
俊作中朝之表儀 禮樂詩書資其懿範溫恭孝愛輔
以多才服道以致身含章而底力經國之用貫百川而
不改其清應物之明體萬象而莫窮其照 福星時雨
既惠巴庸景化元和須歸鼎鉉是用召於驛騎待以天
工重開集鳳之池再仰問牛之化

又揚收加恩制 器茂渾金寶欽大玉瑩清冰於溽暑
挺綠桂於嚴霜行過曾顏道兼夷惠詞冠一時而若非

游藝學該千古而似不能言自鴻飛名場鷺振班列憲
署每聞其守法曲臺咸著於推公常懷造膝之中俾見
沃心之旨謝安體識王儉精能動爲僉論所諧居益具
瞻之望

太平內制源乾曜拜相制 貞白可以勵時道義可以
宏物虛懷同於抱月懸鏡不疲利器比於成風刺鐘無
滯固可充左曹之駁議翊中臺之謀猷用參金鉉之司
兼踐玉壺之制

裴度拜相制 文融菁華行茂枝葉居然廊廟之器出

於領袖之門西掖司言南臺執憲常懷遠畧屢告嘉猷
實宣力以徇公况外身而憂國霜雪無改雷風有恒

崇道德之藩籬士有致命資忠信之甲冑兵無容刃人
具瞻爾天方賚予

崔嶼崔龜從拜相制 漢中大業魏邴克贊其謨謀開

元盛時姚宋同匡其治理 烈火方熾珪璋更寒飛霜

已嚴竹栢猶翠自出入劇職徊翔清途經歷五年恭勤

一貫粉署潔賜衣之操掖垣高白鳳之文 吉甫德全
於文武彥回望著於台衡既諧具瞻實允元輔 於戲
惟木從繩載懷藥石之誠惟風偃草奠流霖雨之功與
其順美以昭忠不若盡規而輔德與其嚴刑而就理不
若齊禮以安人佇聞嘉言共底交泰無令伊傅獨美典
墳

張說讓右丞相表 臣少長儒門懇鑿墳史才非高俗
官不因人徒以命偶龍興位階鴻漸五入西掖七踐南

宮中間拙延謫放直招玷缺傷矢之禽聞弦虛墜賜環
之客聽歌先泣此則魂爲危感氣由懼奪安可重收廢
器再辱端揆何以師長禮闈正持憲府當今典章革故
風教鼎新野無四隱朝有三傑具瞻之地願擇時髦臣
幸沐遺簪墜履之恩好生養老之德朝遊簡牘暮對圖
書受賜無涯循榮過分豈更干處士之橫議招匈奴之
遙哂艾骨自瘡負乘致寇雖則愚情懷戀覲冒求寵亦
望聖慈限約令度餘年願停今授長守舊史

元稹爲蕭相公讓官表 臣猥以凡才謬居重任當陛

下維新之始辱陛下爰立之恩有累樞衡無裨衮職外

致匈奴之哂內失蒼生之心推換炎涼因循德澤妨塞

賢路塵忝台階自顧疲驂方求息駕豈謂陛下特迂神

鑒曲盼凡材再生

集作提

腹背之毛重委股肱之地大幸

人望猶簡帝心雖君父深恩莫知其惡而駑駘力竭何
以自安豈敢退而生光實願求其死所伏望再移天眷
重選時英特迴加膝之恩別求沃心之相

錢翊代人謝再入相表 中台不耀先慙箕斗之光元
首自明何効股肱之力

胡曾賀高相公除荆南啟 臂斷華山宜假巨靈之力
決平洪水須憑大禹之才 既無易於肩堯遂有成於

命說

杜牧謝周相公啟 常切如家之憂每懷撻市之恥

羅隱投永寧李相公啟 今者風雨得生成之候鑪錡
升鼓鑄之司郭令軍前潛抽妓樂崔寧城外暗毀池臺

登庸之時序未遙反旆之鎡基已兆

李商隱賀相國汝南公啟 伏惟閣下昭回降彩沆

灑融精徃執靈鈺正星辰之分野今調鏤鼎猶日月之
得天昔軒后師臣成王畏相殷奉伊尹則謂之元聖周
事呂尚則命爲太公此王者之所以尊賢傑而不以爲
疑也至於姬旦金縢不與燕召同列仲尼麟史不令游
夏措辭甘盤尊舊學之名夷吾居仲父之位此又賢傑
之所以自負其道而不以爲讓也上下交感人祇叶從

是我后夷姦秉哲之辰是閣下宰物匡時之夕清廟係心
矣蒼生延首矣允也無間樂哉惟時某早奉輝光嘗蒙
咳唾牛心致譽塵尾交談而契濶十年流離萬里扶風
歌則劉琨抱膝白頭吟則鮑照撫膺重至門闌空餘皮
骨方從初服無補大鈞穿履弊衣正同東郭槁項枯骸
乃類曹商未知伏謁之期徒切太平之賀

宋劉克莊賀范左相啟 恭惟某官稟元化之精粹蹈聖
人之中庸貴處廟堂耀如山澤其秉心誠實故君子咸

附其蓄德深厚故小人不疑屬者諸公欲手版下新亭
之拜時惟元老獨舉扇障武昌之塵然後太阿之柄還
然後九鼎之勢重十全無遺慮矣一變猶反手然斯謀
斯猷惟君陳之告我朕夢朕卜以汝說而賚予必能容
折檻之人必不罪舉措之士必開密網必革副封必斥
絕弘羊張湯必追還陽城陸贄魯安得削隱然儒無敵
之功吳未可圖良以彼有人之故

魏了翁賀鄭丞相啟 翰苑受命於禁中掖垣代言於

閣下今或先數旬而呈藁斷無楊大年因三讓而求歸
或後累月而草詞亦非劉原父以九制而被遇

張守賀趙丞相啟 獻納論思夙著排姦之節贊襄

輔弼尤高經遠之謀惟光武能推赤心而絳侯可屬大
事會羽書之遽至奉革輅以徂征師律一新坐據江山
之險捷書屢上幾成京觀之封致醜類之宵奔本嘉猷
之辰告射鵰賈勇雖多李廣之無雙指獸收功誰出蕭
何之第一宜頒宸綍首冠台躔舍爵之賞既行歸疆之

期可待

石楙賀張左丞啟
妙呼吸百家之學久代王言奮
經綸四海之才進陪國論賢者在位君子得與帝曰往
哉汝諧人亦喜而不寐

王安石賀韓魏公啟
受天秀氣爲世元龜誠節表於

當時德望冠乎近代典司密總命攬中權毀譽幾至於
萬端夷險常持於一意故四海以公之用舍一時爲國
之安危越執鴻樞遂躋元輔以人才未用爲大恥以國

本不建爲深憂言衆人之所未嘗任大臣之所不敢及
臻變故果有成功英宗以哀疾荒迷慈聖以謙沖退託
內揆百官之衆外當萬事之微國無危疑人以靜一周
勃霍光之於漢能定策而終以致疑姚崇宋璟之於唐
善致理而未嘗遭變記在舊史號爲元功未有獨運廟
堂再安社稷弼亮三世救寧四方岷然在諸公之先煥
乎如今日之懿若夫進退之當於義出處之適其時以
彼相方又爲特美

秦觀賀呂相公啟 媯皇補天之際高宗夢帝之初未

就泥金正資陶鑄不調琴瑟方賴更張是謂大有爲之
時必得非常人之佐恭惟中書僕射相公累朝元老名
世大儒力足以扶持顛危風足以興起貪懦青天白日
奴隸亦知其明璞玉渾金鑒識莫名其器既天資之篤
實加地胄以高華四世五公勲在王室一門萬石寵冠
廷臣宗族謂之小許公夷狄以爲真漢相果從人望爰
享天心方思左轄之嚴遽踐鸞臺之峻獻可替否而思

矯激之過解紛挫銳而有調和之能必欲成仁之始終
非特潔身之去就繇是端人全集異黨寔微寬大之澤
四覃苛刻之風一變名既得功而並立位當與德而俱
崇明詔始班吉士交慶太公入國固知天下之父歸伊
尹得君益見聖人之任重其猥緣幸會叨被題評昔陪
北海之樽有同夢寐今望平津之館如隔雲天但欣衆
正之路開始信太平之塞責

唐王勃上劉右相書 聖人有作羣材畢舉星辰入仕揖

讓朱鳥之門風雨稱臣奔走蒼龍之闕方欲停旒金室
引成康於已任闢廣瑤林復克舜於茲日可謂明明穆
穆盡天子之容貌矣抑嘗聞之丹山九仞烟峰非數簣
之功紫極千門雲臺俟萬楹之力故天下至曠神器不
可獨專天道無私玄勲有待而立書曰元首明哉股肱
良哉好問則裕自用則小况掌萬國之權受一人之寵
動見臧否言知利害君侯足下何時易耶

闕

策宰相科問 夢想傳巖之野佇思磻溪之上

遂得乘箕入相就三命而作鹽梅投釣昇朝封四履而
稱師父 欲使陰陽調六律風雨應四時一百姓之心
平九州之利餘糧棲畝外戶不扃亭障無虞關河罷戍
漁者虛湍瀨田者讓肥腴路不拾遺市無二價眷言於
此何道以臻

晉袁宏丞相桓溫碑銘 河洛澄清華梁卷翳

孫綽丞相王導碑文 柔暢協乎春風溫煥侔於冬日
信人倫之水鏡道德之標準也 匪躬而身全遺功而

勲舉

唐李嶠讓知政事表 臣才實凡庸志無遠大叨預簪履

遂升臺閣踐金門而游石室掌狐史而參鳳綸被蜉蝣
之衣徒竊榮寵接鴛鴦之羽久慚尸曠甘受妨賢之責
忽承非次之恩仍使參預機衡獻替帷幄持濟川之舟
楫味和羹之醯醢以挈瓶之智陪負鼎之遊將何以祇
奉帝難弼亮皇極况丹青所運鼓舞通於四時鑪錘所
裁綱紀行於萬俗動闕政體豈易其人

宋陸游賀周參政啟 典謨實列於六經臣主難逢於

千載高文大作或托之不得其人老師宿儒有死而莫
見於世維時鴻碩之彥早冠清華之途成功昭於神明
大業刻之金石發德音下明詔大哉王言建顯位施尊
名震於方外一變猥釀枝駢之體以還雄深灑噩之風
縉紳竊誦而得師夷狄傳觀而動色顧於昭代可謂殊
勲雖箕頰之志屢陳然莘渭之求馬往恭惟某官任重
而宏毅謨明而弼諧以窮深測遠之才坐酬衆務以極

高蟠厚之氣陰折遐衝至於擅世之英辭本皆全德之
餘事僅少施於一二已見謂於崇鉉豈容卷懷經濟之
圖遂欲袖手寬閒之地公無困我初誦留行之言上誠知
人亟下延登之命然易簡者聖君之眷難居者天下之
名方仰對於寵光願益思於抑損茂迪謙尊之吉永爲

善類之依

已上知
政事

唐賈至授房瑄文部尚書同平章事制 秉忠義之規
靡憚艱險挺松筠之操寧移歲寒宜承題劍之榮式允

濟川之望

楊鉅授陸宸平章事制 咸獲抱降神之韻珪璋挺華
國之容包倚相之典墳紹平原之辭藻

又授孫渥平章事制 壁立孤峰渭清一派早以閨門
之行聞乎鄉黨之間張融高文聚爲玉海孫綽麗賦擲
作金聲頗喧驚座之辭華遂整冲天之羽翼鵬張上國
顏淵首冠於諸科弓招小山穆生道優於置醴厥後簪
御史筆講博士書從容累踐於南宮諫諍俄升於左闥

蘭香見忌玉冷多猜比騷人湘浦之行繼賈誼長沙之
役朕自知直道召歸掖垣每於敷陳必盡肺腑因朱雲
折檻之對識張華王佐之才斷自中宸爰立作相彌縫
不倦匡益居先操心願革於澆浮進善必先於行實搜
決沈滯拔用隱淪致我時風自爾而厚 張說當玄宗

之代初啟集賢竇參居德宗之朝別分戶部一則寵九
流之墳籍一則萃四海之賦輿式仗英規遂茲兼領

除鄭朗工部尚書同平章事制 王室髦彥士林菁英

溫華凝珪玉之姿磊落負棟梁之任

宋鄧潤甫除文彥博平章軍國重事制 惇大而清明

方嚴而信厚出則秉乎旄鉞入則總我鈞衡文武兼備
其才夷險能致其力畢公之弼四世三紀於茲傳說之
總百官萬邦其人爵隆無富溢之累名遂有身退之榮
神明相其康壽人心想其風采是用還之論道倚以經
邦以帝者之師臣謀議廟堂之上以天下之大老制馭
夷狄之情庶幾有爲底於極治陪敦多井申行真封於

戲呂望惟賢起佐文王之治周公已老留爲孺子之師
矧我耆英無愧前哲往宣一德用格多盤

李沆除呂蒙正中書侍郎兼戶部尚書平章事制天
道無私日月星辰助其照皇王不宰股肱輔弼代其工
所以端拱守成垂衣制理求建丕平之景運遐追三代
之令猷其有業茂經綸才推謹厚參大政而已淹星歲
秉至公而無捨寅昏宜頒出綈之殊恩俾正持衡之重
柄爰擇剛日特降命書推忠佐理功臣朝散大夫給事

中參知政事柱國東平郡開國男呂蒙正四氣均和五行鍾秀有濟時之畧輔之以溫恭挺命世之才守之以循默爰覩舜旌之進善遂指魏闕以來儀臨軒覩敏瞻之能射策見縱橫之畧暨茲登用益著謨明公忠推社稷之臣凝重見廟堂之器秉茲大體久鬱具瞻屢宣作礪之功克懋秉鈞之績別錫褒功之美號仍陞馭貴之崇階勲籍增榮井田加賦預列侯之峻爵同大利之計書顧優恩之在茲諒名器之無假於戲雲從龍而風從

虎今也其時啟朕心而沃朕心必求諸道爾宜周旋庶
政佐佑眇躬緩茲宵旰之憂翊我隆平之運同底於道
豈不美歟

唐李嶠為水潦災異陳情表 臣聞明主程才先求於稱

職忠臣効用必務於量已然後庶官無廢百度以康若
使假鳳登朝真龍不馭將緣鶴之鼎方憂於折足和鸞
之駕必誠於傾輶豈徒鐘鼓生妖蠻夷起笑而已臣瓶
筓賤器駕蹇輕姿同鼯鼠之五伎不成異飛鴻之六翮

兼備遭逢幸會累叨階級陛下降非常之澤垂不次之恩昇之冢司握九流之銓管委以樞近參萬幾之損益傅說作舟之命徒奉箴規仲山補袞之談曾微答劾致令衡鏡失序紀綱不張官僚日增府庫歲減謬職之謗或譏於畫虎續貂敗官之尤有議於誼盧吠鵲下生朝野之蠹上悖陰陽之和水潦爲災慮深於昏墊黎氓失稔憂在於溝壑軫皇情於南面墜國庾於西成虧燮理之則失平分之度推其咎戾實在微臣昔者堯逢阻饑

而四岳咨訪漢遇災異而三公策免舉遺才而求俊乂
退不肖而清庶官厥有由來著於古昔臣緝熙莫効尸
曠無成以擁腫之凡材抱支離之痼疾久懷致寇之祿
猶帶妨官之綬覲目而視不遑自安是用啟處慚惶寢
興誠惕思解鷓鴣之服願辭鷓鴣之行庶得保愚公之
廬避賢者之路以寧衆口之囂諉以答三靈之譴咎物
情朝序誰謂不宜昔干木辭第恒思衛生營平寢瘵不
忘憂國當今兵戎未靜費務方多人庶空虛官僚苟且

不可不深爲防慮妙思政術臣銜恩佩德念咎慚榮雖
智効無聞自甘於罷黜而庸短所見猶樂於輸畫

劉禹錫代杜司徒謝平章事表 臣聞天下安危注意

將相處論道具瞻之地當總戎作鎮之權雖叶夢而求
無聞秉鉞之寄登壇以拜不兼調鼎之榮授受惟難伊
昔猶爾况臣庸瑣何以克堪陛下玄造曲成大明私照
俾掌戎律復參廟謨寵光之命在臣已極毫毛之效於
國何施謹當罄竭微誠奉導至教仗天威以懾不順敷

聖澤以遂羣生上分旰食之憂下塞素飡之責力誠不

足心實念茲

己上平
章事

唐中宗授韋嗣立黃門侍郎制 絳衣近侍秩亞貂蟬

青瑣崇班職參鴛鴦實神化之有寄信賢才之攸重某

忠規奕葉孝緒蟬聯家匡玄鷲之朝人輔彤雲之代芝

蘭並秀見謝砌之階庭騏驥齊驅有劉山之昆季入光

振鷺譽滿三臺出據憑熊聲流十部近者命茲鷲渚已

擢雁行纔出芸扃奄歸萬里永言荆樹坐折連枝眷彼

恒山空餘一鳥俾遷榮於皂蓋宜襲寵於黃樞

陸贄授盧翰劉從一門下中書侍郎平章事制 自鸞

車載駕薄狩於梁執羈有從我之勤及雷勵匪躬之節
交修不逮庶績其凝

梁任孝恭爲羊侍中讓表 搏風扇翮不覺高升擊水

揚馨遂迷遠大猶願長城巨防射魯仲之書白羽朱旗
振武安之几深入五千張空券以報主橫行十萬勒燕
嶺而酬君

梁王筠爲從兄讓侍中表 至如元勳舊儒之胄積德
累仁之基九世七葉之華相韓事漢之資不然則子駿
之學洞古今平子之思侔造化仲宣之辯識無滯次重
之解經不窮然後可以喻旨公卿問對惟展陪六尺之
輿通四方之意求之微臣此塗頓隔

任昉爲王思遠讓侍中表 行則六尺之內陪接天光
語則親璽申命誠信區宇獻可替否出納惟幾敷奏於
金華之上進讓於玉堂之下金遷七貴之茂王粲二公

之孫雖復仲蔚孤緒元卿末裔未有不階民譽妄承曲私者也

唐錢珣代王相公謝加門下侍郎食邑表 陛下道惟樂

育志在紹聞待河清而先靜化源致俗阜而深探理窟
當乙夜縱觀之後啟輔臣夢得之休而遽以平衡授茲
弱質頗垂庶政莫達大經何施作相之才但累知臣之
鑒厭兵而五兵尚在唯恐人殘祈穀而百穀未升仍憂
歲旱尋宜待罪已合避賢陛下慎以退人容於竊位兼

迴睿曠遠正台階進當浴鳳之榮更懼惟鷄之刺

李嶠讓鸞臺侍郎表 臣志狹量淺業空理踈揆才異

言行之科入仕非廉高之選邀屬時幸累叨榮級石渠

麟閣司典簿之林金門鳳池參廟堂之議以小才而居

大任用近智而恢遠畧緣鶴之鼎既失於鹽梅濡鵝之

衣實慙於紱冕甘待素飡之責忽承非次之恩夫以瑣

闈崇嚴玉堂祕近職參持蓋位亞掌壺子雲以善屬文

詞始應夕拜李真以妙通經術方陪旦講臣之愚陋實

畏友朋豈足以奉惟懼之昌言聯名賢之逸軌且短才
不齒未減雙鳧之數豐秩妄加必喪羣龍之績

梁元帝黃門侍郎劉孝綽墓誌銘 蔡墨攸陳有草有

茵梁荆世橫或魏或秦積善餘慶時惟俊民孝乎惟孝
其德有隣曰風曰雅文章動神鶴開阮瑤鵬翥楊循身
茲惟屈扶搖未申人罔石火山有楸椿佳城無曙寒野

方春

已上門
下省

唐韋承慶中書省詩 清切鳳凰池扶踈鷄樹枝唯應集

驚鷺何爲宿羈雌大造乾坤闢恩深雨露垂昆蚊既舍
養鷺駘亦驅馳木偶翻爲用芝泥忽濫窺九思空自勉
五字本無施徒喜逢千載何階答二儀螢光向日盡蚊
力負山疲禁宇庭除濶閒宵鍾箭移暗花臨戶發殘月
下簾歌白鬢隨身改丹心爲主披命將時並泰言與行
俱危寄謝登巢客堯年復在斯

楊炯和騫右丞省中暮望詩 故事閒臺閣仙門藹已深
舊白章窺複道雲幌肅重陰玄律葭灰變青陽斗柄臨年

光搖樹色春氣繞蘭心風響高牕度流痕曲岸侵天明
總樞轄人鏡辨衣簪日暮南宮靜瑤華振雅音

唐蘇頲授姚崇兼紫微令制 聞善若驚欲仁斯至衣
冠以爲著蔡廊廟資其柱石朕之欽者管樂人之傑者
蕭張遂能以身許國開物成務邦是用乂朝唯得賢北
辰環拱西垣近密俾因題劔之榮式演如絲之命

沈詢授裴休中書門下平章事依前判鹽鐵制 俾登
玉鉉用振金聲 早昇甲乙首冠賢良諫垣馳謙正之

名史氏動直言之筆羽儀著定律呂縉紳仙闡道播於
彌綸右掖詞推於潤色 爾其允釐庶績俾起訐謨涉
大川而示吾津涯馭六馬而遺吾銜策 無使阿衡專
美於殷家山甫獨稱於周室

吳融授王搏中書侍郎同中書門下平章事判戶部制
朕聞王茂弘官在治中已恭佐命謝安石身爲相掾
常切憂時後果俱秉國鈞克諧人望忠誠懿烈焜燿冊
書孰謂我朝鍾茲丕運厥有佳士龍興壯圖植勁草於

衷腸繫苞桑於宗社特立當代何慙古人將表至公爰
申異渥具官王搏霜高一鷄玉振孤峰孕和煦於情田
自華而實道縱橫於義路無往不通蘊是淑聲居然上
品繫駒場裏早颯清塵振鷺行中難究逸翰踐揚三署
橫絕一時實名教之丹青乃縉紳之領袖

除韋嗣立鳳閣侍郎平章事制 鳳池清切鷺渚便蕃
出納兩闈允資一德

除唐休璟左庶子同鳳閣鸞臺三品制 巨源請老仍

參翼贊之榮叔子養德選預國朝之議宜輟五曹之務
俾同三令之班

宋謝莊讓中書令表 伏惟陛下登取震維臨齊璿政
澤與風翔恩從雲動臣聞璧門天邃鳳沼神深絲綸王
言出納帝命自非望允當時譽宣庠塾未有謬垂曲寵
空席茲榮在於平壯猶不可勉況今綿痼百志俱淪
唐李嶠為王及善讓內史第二表 臣才疎行缺運偶時
來榮匪德遷官由恩達法河象岳升臺歷府行參八命

坐陟九霄彤軒皂駟非振鷺之飾青組丹紱是濡鵠之
譏施重丘山効微涓滴妨賢自久速謗滋深頃因齒髮
之衰得蒙骸骨之賜西河退老非翫經書東海歸閒空
求藥餌方養支離之疾翻成愷悌之恩曲降絲綸重收
簪屨徵榮槁木責焰寒灰將使策蹇磨鉛入總樞秘牽
羸引憊參典鈞石仰林恩渥顧探心守桑榆且晏蒲柳
先秋方與絳縣老人論其甲子淄川艾耄比其容貌將
何以對敷金展趨奉玉墀當鳳沼之便蕃望龍闈之清

切况寅亮皇極經綸帝道功參濟巨義等作霖隆替是
因具瞻斯在永言授受豈當容易是用深鑒陳力載懷
量已方憂折鼎乞保懸車且今百度惟貞九流式序鵠
鴻齊列俊又在官可使畫虎承羞豐貂竊幸謬中孚之
好爵辱大雅之能官伏願深惟至公俯收曲澤矜此疲
劣改命才賢則器滿之凶不累於愚叟棟隆之吉永光
於聖代

又爲王方慶讓鳳閣侍郎表 爰迴斗極之暉更寵掖

垣之授下神畿而入仙禁未變葭灰自鸞渚而游鳳池
僅雕萸葉荀侯之十旬累命未可爲倚車公之一歲九
遷曾無足比

又爲楊執柔讓同鳳閣鸞臺平章事表 夫以衡石萬
機鹽梅三鉉參翕闢之玄造輔丹青之景化自非騰華
占渭出昴秉箕安可寅亮帝圖弼諧邦教

梁元帝中書令庾肩吾墓誌 荆山萬重地產卞和之
玉隨流千仞水出靈蛇之珠故能肩茲屈景育斯庚朱

掌庾命族世濟琳琅遂昌開國蟬聯冠冕父易高尚其

道肥遁貞吉闕吏早逢風表真人之氣少微晚暎還彰

隱士之星肩吾氣識淹通風神閒逸鐘鼓辭林笙簧文

苑入爲度支尚書任同北斗錫韓稜之劔朝比南宮識

鄭崇之履余以其爲人也瑚璉之器無慚垂棘杞梓之

材有均廊廟故贈散騎常侍蓋旌賢也

已上中書省

唐任希古和左僕射燕公春日端居述懷詩 豐野光三

傑媯庭贊五臣綈歌美譽絲竹詠芳塵聖歷開環象

昌年降甫申高門非捨築華構豈垂綸鳳邸搏霄翰龍
池躍海鱗玉鼎昇黃閣金章謁紫宸禮闈通政本文昌
總國均調風振薄俗清教叙彝倫星迴應緹管日御驚
寅賓葉上曾槐變花發小堂春思挂東都冕言訪北山
中赫赫容臺上千祀耀平津

羅隱投宣武鄭尚書詩 漢代簪纓盛梁園雉堞雄物
情須重德時論在明公族大踰開魏神高本降嵩世家
唯蹇諤官業即清通翰苑論思外綸闈嘯傲中健毫驚

綵鳳高步出冥鴻履歷雖吾道行藏必聖聰絳霄無繫
滯浙水忽西東庾監高樓月袁郎滿扇風四年將故事
兩地有全功去去才須展行行道益隆避權辭憲署仗
節出南宮鴈影相承接龍圖共始終自然須作礪不必
恨臨戎幕下蓮花盛竿頭獬佩紅騎兒逢郭伋戰士得文
翁人地應無比簞瓢奈屢空因思一枝桂已作斷根蓬
往事應歸捷勞歌且責躬殷勤信陵館今日自途窮

陳後主授江總尚書令冊文 夫文昌政本司會化經

韋彪謂之樞機李固方之斗極况其五曹斯綜百揆是
諧同冢宰之司專臺閣之任惟爾道業慄峻宇量弘深勝
範清規風流以爲準的儒宗學府衣冠以爲領袖故能
師長六官具瞻允塞明府八座儀刑載遠其登朝握揆
朕所望焉往欽哉懋建爾徽猷亮采我邦國可不慎與
唐常袞授李忠臣右僕射制 文昌所以法成象端右
所以長庶寮秦漢則內掌武事魏晉或外綏戎政 備
五才之用有百勝之全往者寇孽亂常闕洛多故爰奮

其旅以先啟行大城名都所麾必克元克巨猾傳首相
望定齊休士有建威之得雋破趙會食亦淮陰之用竒
漢東汝南專制千里總三軍之號令兼八使之澄清約
已撫人守公遵職訓師以禮載寧於戎閫庀賦從薄繼
入於王府四封不聳一紀於茲况忠衛之勲邦家是賴
陝郊巡幸憂國存誠能釋位以勤王亦見危而致命疾
風逾勁何日忘之申伯于蕃自當褒勸韓侯入覲宜有
寵光式是南宮俾崇禮秩

又授令狐彰右僕射制 有張仲孝友之行有吉甫文武之才秉其直方資以簡厚早擅韜畧尤工墨妙艱危致命出入勤王中興之勲羣帥難尚雖騾騎之北至高闕淮陰之東下井陘積事度長抗衡異代自受任千里疆於兩河靖安軍戎肇正封域弘布風教宣明憲章優禮意於文吏洽仁化於氓俗息馬論道讓其保塞之勞愛人省刑守我中朝之典

蘇頲授劉知柔尚書右丞制 蹈典墳之芳潤總詞賦

之笙簧慮常密於在公迹自勤於爲政萬人登數已聞
書版之精六官揆才更俟彈珠之妙

齊謝朓爲明帝拜錄尚書表 升降玉階對揚休命六

轡在手千里何偕司會天官之統尚書百僚之本弘之
卽庶績惟凝替之則彛倫斯歎修身踐言本慙五美果
行育德未階六正妄屬負圖之寄多謝五仁之績操檜
檝於龍津荷梓梁於雲構無以輔位明堂遺像麟閣

北齊邢子才爲文襄皇帝讓尚書令表 揚職萬機總

任百揆懸衡庶物準納羣僚何以助日月之光華增天地之高厚反鑒取照匹此何難倒裳求領方之爲易
梁沈約拜尚書令到都上表 油雲湛露徒降旻昊之
德弱縞輕蟬不載丘嶽之重登階望席恍焉失步

唐柳宗元為樊左丞讓官表 尚書百揆翊亮萬機故天上尊北斗中樞陛下有南宮左轄晉昇孔坦諒直當時漢拜楊喬閑練故事庶得百僚有裨於會府諸侯取法於京師

後漢繁欽尚書箴 龍作納言帝命惟允山甫翼周實
司喉吻赫赫禁臺萬邦所庭無曰我平而慢爾衡無曰
我審而怠爾明四岳阿鯨績用不成虞登八凱五教聿
清舉涉其私乃忝服榮正直是與伊道之經先人匪懈
永世流聲君子下問敢告侍廷

晉摯虞尚書令箴 明明先王開國承家作制垂憲仰
觀列曜俯令百官政用罔僭昔舜納大麓七政以齊內
成外平而風雨不迷山甫翼周靡剛靡柔補我袞職闡

我王猷王猷允塞而四海咸休雖曰聖明必賴良材無
曰我智官不任能發言如絲其出成綸千里之應樞機
在身三季道缺天網縱替既無老成改舊法制法制不
循不長厥裔尚在司臺敢告侍衛

已上尚書省

宋蘇軾賀呂副樞啟

近膺告命入總樞機中外聳觀朝

廷增重伏惟慶慰竊以古之爲國權在用人德厚者輔
其才而名益隆望重者無所爲而人自服是以淮南叛
國先止謀於長孺汾陽元老尚改觀於公權樽俎可以

折衝藜藿爲之不採哀此風流之莫繼久矣寂寥而無聞

李劉賀喬樞密除參政兼知院啟 歲大旱而作霖

啟沃良資於傳說天未陰而徹土綢繆允賴於周公邦其永孚於休公有無窮之聞

又賀薛樞使啟 顓席紫樞均茵黃閣仲虺居薛宜登

左揆之虛臯陶矢謨還倚右平之重有常立武無競維人合文武以兼資佩安危而注意熙帝載宅百揆民

具爾瞻掌邦政統六師君則誰與式端兵本專領使權
匈奴款塞五原固出干羽之舞子房決勝千里正須帷
幄之籌帝曰欽哉相尊等耳山有木而工則度姑遜滕
侯之先封河如帶而國永存實自薛公之上計

又賀俞簽樞啟 春秋九世之讐固將必報善人百年
之運未有不興今觸蠻交鬪之已深計蚌鷗相持之不
久下策莫危於浪戰上兵實貴於伐謀在帝王之萬舉
萬全固求耆宿然疆場之一彼一此正欠堅凝幸而及

閒暇之時亟宜定修攘之計取亂侮亡兼弱也時則易
然同寅協恭和衷哉政將焉往鴻鈞既轉於一氣黃麻
即似於六經

已上樞
密院

唐李嶠授張昌宗麟臺監制 碩學總於丘墳高才軼於

睢渙資澹雅之操無欲無營體撝謙之風不矜不伐每
懷五嶽之舉期陟九仙之路雖混濟之量未去朝廷而
玄遠之心恒對山水 子雲寂寞雅好文詞季長博通
堪典經史宜因松柏之性處以蓬萊之山

又授王方慶麟臺監修國史制 芸閣秘文蓬山與府
是爲國重尤切帝難 西垣掌誥雖藉謨猷東觀屬詞
更資通博宜輟鳳凰之省俾緝麒麟之署

常袞授李漉秘書監制 傳魯恭之古文稟吳季之知
樂 寧止於敦族以恩固在於叙賢以位周稱外史晉
謂內臺俾領儒官是崇禮秩

又除李羣玉校書郎制 放懷丘壑吟咏性情孤雲無
心浮磬有韻吐妍詞於麗則動清律於風騷冥鴻不歸

羽翰自逸霧豹遠跡文彩益竒信不試而逾精能久幽
而獨樂念其求志可以言詩用是繫維俾之刊校可守
弘文館校書郎

唐太宗正授顏師古秘書監詔 秘府望華史官任重
選衆而舉歷代攸難守秘書監顏師古體業淹和器用
詳敏學該流畧詞兼典麗職司圖書亟經歲序朱紫既
辨著述有成宜正名器允茲望實可秘書監

晉華嶠謝秘書監表 劉向父子世典史籍馬融博通三

入東觀非臣庸賤所敢擬跡

齊王融拜秘書丞謝表 臣聞升離戒晨陰墻不照其

景膚雲停夕幽草或漏其津至如明兼就日澤深行雨
不有聖德誰或其然所以欽至道而出青臯捨布衣而
望朱闕懷祿惟在代耕期榮不謀入用豈悟特擢之例
事均延祖置左之恩任光元幹踰溢情涯普燭身表畏
翹車而不讓誠濡翼之願辭既聖主謂其可施故愚臣
默思自勉

梁沈約到著作省表 臣藝不博古學謝專家乏懷鉛
之志慙夢腸之術聯事乖善握蘭慚良謬勒斷蛇之符
預刊冰河之業路遙難騁才弱未勝而神工曲造雕綉
彌疊珥筆史觀記言文府趨奉載揚腆懣交頽

唐李嶠讓麟臺少監表 含香握蘭惟塵於兩鳧之署

切問近對匪服於雙鸞之沼西垣載筆五字非工東觀
屬詞兩班難嗣 惟此挈瓶有同畫餅豈足以比肩良
史參領秘文猶陪二子之行尚忝四郎之末網羅帝籍

既佇英才出納王言寧容妄處

宋真德秀除校書謝丞相啟 聖朝重英俊之儲冊府萃

圖書之富匪特養以資望蓋將充乃見聞使旁搜博覽
優游文史之清庶潛省默觀磨礱器質之美觀作人之
有道殆與天之同功故菁莪既盛於一時而豐芑尚遺
於數世大者光明魁壘足以翼邦家小者靖重端方可
以善風俗深嗟流弊寔異前觀育才之意視以具文庇
職其間指爲借徑至有深居儒館心別驚於高華名在

書林手弗親於讎校鄙習相仍而莫悟清途沿是以反
輕力回此風政在今日念昔脫身於場屋益思銳意
於簡編然家無鄴侯挿架之藏徒日發董子下帷之憤
今將徜徉東觀凌厲西崑閱河圖寶訓人間希有之珍
窺金匱石室歷代不傳之秘刊訂譌謬含咀英華庶幾
因文字以窺聖賢之用心夫豈假梯媒以爲富貴之張
本昔揚雄之居天祿蓋二三世而不徙官而韋述之在
集賢亦四十年而後卒業故能發揮大典焜耀方來此

前修之所已行而小子之所願學迄成微志有賴洪私
何臬賀曾校書啟 登天祿之崢嶸遊道山之清切
玉杯繁露之異悉考舊聞金馬碧雞之雄盡探竒跡豈
惟閱簽軸之秘良以養梁幹之才

唐李華著作郎壁記 化成天下莫尚乎文文之大司是
爲國史職在褒貶懲勸區別昏明故駟牧頌於魯侯祈
招諷於楚子史官之任有述作焉盖王者之元符生人
之極教也昔沮誦一作倉頡爲黃帝史臣文字以興

其來尚矣若南正北正建於顓頊義氏和氏命於唐堯

更虞夏商代序天地周官宗伯之屬有太史正歲年以

序事小史奠系代辨昭穆內史受納訪以詔王聽理外

史達書名於四方前志所載有左史記事或箴王之闕

或司過於朝所典不同其納君於善一也傳曰天子有

日官則史逸史伯

疑作史佚史倫

是也諸侯有日御則禘竈子

韋是也倚相在楚南史在齊董狐在晉邦之司直也其

事舉則三靈不隱其政息則百度惟危故先王貴之至

於漢庭參用周禮太史公既歿其子遷緘金匱石室之
文焉降及東京永平中特詔班固著作東觀繼其事者
楊彪蔡邕由是太史但掌天文律曆而已小雅寢周聖
人生魯道尊而文武將墜德至而天地不通感於獲麟
嘆於與蜡爰制國典丘明傳之因曆象以正時元假鬼
神而討有罪善人勸焉淫人懼焉百代之英所由用也
向若前代闕能文之史曠記事之官雖舜禹之烈無聞
焉有國有家何以直道而行也魏太和年肇以著作名

官爲中書屬晉元康年改隸秘書朝服單衣介幘始親
職必選名臣傳歷宋齊梁陳官品第六元魏高齊周隋
秩從五品魏則王沉以侍中兼之衛凱以尚書帶之至
於有晉若史材之美陳壽自佐郎遷元舅之尊庾亮以
中書領宋則徐爰何承天齊則沈約裴子野梁則陸雲
公姚察陳則顧野王張正見後魏則崔光高允北齊則
邢子才魏收周則蘇亮柳蚪隋則虞綽王邵皆一朝名
選也 唐之建官罔非俊乂若虞永興德函大雅魏侍

中才高王佐鄭吏部絕韻鏘鳴崔司業雄詞飛動皆歷
馬名岳已遷別封天柱舊章不改尚列周官登陟蓬
萊之峯循環藏室之典從容簡貴信君子保明弘道之
司歟

已上秘
書省

職官部 館閣

唐白居易授沈傳師左拾遺史館修撰制昔談之書遷
能修之彪之史固能終之惟爾先父嘗撰建中實錄文
質詳畧頗得其中爾宜繼前志率前修無忝爾父之官

之職

薛廷珪授鄭璘盧擇充史館修撰制紀綱專總於丞

相筆削分任於名儒非夫望蘊司南才膺載筆者不當
其選博聞強識繩直冰清四時之和氣襲人一字之
褒貶惟正聞見事典周知故實可以著不刊之書論司
過之史爾宜詳於注記紀乎言動之非繼彼春秋明乎
得失之跡彰善癉惡無忿疾厥心舉直錯枉無上下其
手

崔嘏授李毗等集賢校理制 披書殿讎校之文秉東
觀鉛黃之筆必選其雄詞擲地敏學通天者而授之
或荆山蘊片玉之姿或桂樹擇一枝之秀

崔瑤授蕭寘充翰林學士制 揮翰金門諒屬詞華之
妙論思玉署尤資周慎之才 文擣錦繡學富縑緙早
命中於射宮遂從知於壺典靜無違心動有餘裕用雖
繫於通塞道自保於歲寒

崔嘏授裴諗司封郎中依前充職制 臺郎望美詞苑

地高聚列宿之輝華參起草之宥密自非風儀玉立器
宇川停摶撲天之雄文蘊擲地之清韻則不足以膺我
妙選爲時美談 襲慶於門騰芳載席端莊抱吉士之
操謹默得賢人之風灼若春華皎如瑞素

錢翊授韓偓翰林學士制 雖公賞曾光於赤紙而直
誠尚記於皂囊

薛廷珪授李昌遠等充翰林學士制 士林擢秀聞爾
則百尺無枝筆陣交鋒聞爾則一戰而霸皆伸於知己

副我旁求濟柱下之清源無忘啟沃紹雲間之華譽勿
鼓喧囂慎繼前修罔言溫樹

宋呂祖謙中書舍人除翰林學士誥 內外演綸之職
獨高翰苑之清華左右持索之臣疇若禁林之近密維
時盛選屬我洪儒輟從西掖之聯延入北門之直具官
某學窮閭與文冠倫魁增主之明洋洋晁董之對發帝
之令渾渾虞夏之書休有德聲最於邇列是用進陟鑿
坡之邃深居鈴索之嚴虞侍燕閒輔陪遺忘鬯典謨於

三代新瞻聽於四方近天子之光允賴謀猷之啟沃見
王者之志邇觀詔命之發揮

唐權德輿為齊相公讓修國史表 伏以褒貶善否裁成

義類直辭是繫徃哲攸難臣謬踐台司無補皇化每憂
覆敗上負聰明豈足以再紆宸慈累忝榮渥稽前古之
彝訓昭聖朝之法誠立言載筆豈易其人量力循涯自
知不可又自貞元四年李泌後宰臣遂不兼此職蓋以
論著慎重留於聖心自非時謂全才何以遠循故事用

此內省以榮爲憂况君舉必書時同堯舜之理任人以器顧無遷固之能

宋翰苑新書謝除學士表 歷考名臣具存故實陸贄於詔書之重每上奏編歐陽雖帖子之微不忘規諫臣何爲者心切慕之

歐陽修謝宣召入翰林表 久叨塵於侍從曾莫著於勞能而自出守外藩近遭家禍苟存餘喘復齒周行風波流落者十年天日再瞻於雙闕進退之際已蕭颯於

霜毛慰勞有加賜憐憫於玉色

唐王維謝集賢學士表 臣抽毫作賦非古詩之流挾策

讀書無專經之業伏惟陛下文思超前哲之后書契踰

畫卦之君龜圖不能比其詞龍甲不足究其義聞相如

在蜀畏不同時徵枚乘於齊惜其已老急賢之旨欲賜

追鋒如臣不才豈宜濫吹將何以編次漆簡刊定石經

東堂賦詩將招不成之罰北面待詔必無善對之才以

榮爲憂席寵知懼

宋真德秀謝宣召入學士院備顧問表 切觀列聖之用

人惟待詞臣而加禮蓋於言語文章之外責其論思獻
納之忠或雖忤旨而暫閒終必棄瑕而復用修除翰苑
在環滁出守之餘軾侍禁庭亦赤壁歸來之際加歲月
則其文老涉變患則其慮長乃登邃嚴以備顧問如臣
者才華弗競慙拙自將掌先皇帝內制者六年每慚越
俎迨陛下初元之再命竟許循墻以驅馳州縣之頻且
放廢山林之久見聞寢少藝業益荒結茅屋於雲邊已

甘終老瞻玉堂於天上若隔前生敢云白首之重來誤
辱清衷之親簡

蘇軾謝宣召入院狀 視草之官自唐為盛雖職親
事秘號為北門學士之榮而祿薄地寒至有京兆掾曹
之請豈如聖代一振儒風非徒好爵之縻兼享大烹之
養玉堂賜篆仰淳化之彌文寶帶重金佩元豐之新渥
既厚其禮愈難其人 朝論所高禁林為重非徒翰墨
之選乃是將相之儲禮絕同僚嘆裴李於座上功成異

域得頗牧於禁中宜有異人來膺此選

又謝宣召再入學士院狀 使星下燭生蓬華之光華

天澤旁流失桑榆之枯槁國有用儒之盛士知稽古之
榮翰墨之林號稱內相文章之外不取他長至於用人
可以觀政文武並用或成頗牧之功邪正襍居至有任
文之患惟貴且近故難其人而况金鑿玉堂親被絲綸
之密北扉東閣獨稱年德之高必有異人以齊衆口而
臣本緣衰病出守江湖以一方彫弊之餘當二年水潦

之厄戴星而治僅免流離及瓜而還恍如夢寐交親迎
勞都邑聚觀驚華髮之半空笑丹心之未折宜投閒
散以養衰殘豈期過採於虛名復使榮加於舊物

王邁賀林直院啟

矧當多事屢驚夜響之鈴絛豈比

平時卧看日移於磚影慰撫河北則大手筆何慊於德
裕調撥關西則凡號令宜付之遜能起詔草若湧泉惟
陸相始當於機務發德音於時雨必韋公乃福於生人
求如在昔之前修庶可當上之遴選 學力與天相融

聲名無地可著筆有活法珠走於盤而不出於盤派接
古文氷生於水而尤寒於水凡名山大川之偉觀與浮
屠老子之靚居皆藻飾以雄詞盡膾炙於衆口帝謂琳
琅散落至煩雷霆之取將孰如琬琰編摩要與日星而
爭耀乃攷天旨寵畀氷銜吏部二百年之文已歸中禁
瀛洲十八士之選皆避一頭

夏竦謝直集賢院表 竊以承明設待詔之官實漢朝
之芳潤麗正啟修書之院乃唐氏之英華濬圖書之淵

啟龍鳳之宇自非弓裘繼世章句名家通授義畀如之
靈篇開書笏珥彤之故事則何以繼成康之美頌考宣
武之懿文陪法從於甘泉奉宸游於屬玉况當聖日允
屬簡求如臣者學不傳經文非近史青青子佩雖見刺
於勞心翹翹錯薪亦濫期於刈楚 遂殺青而奏技果
出綈以推恩禁林俾試於彫蟲書殿遽令於抱槧閱上
帝之冊府目眩星辰登道家之蓬山足踐雲氣奉長者
之餘論與先生而並行分直石渠地接嚴更之守縱觀

金匱門連著作之廷載惟螻螻之軀莫報乾坤之賜

趙

開

賀集賢楊修撰啟

平津第一諒博極於天

人江夏無雙且恣觀於圖史顧亨途之伊始實與議之
攸歸矧瀛洲列仙之殊庭羣玉上帝之冊府昔者金泥
石檢嘗草東觀之儀縹帙芸籤重定開元之目今天孫候
翠華之幸屋壁藏科斗之書必將講故事於乾封聿修
盛禮訪遺編於汲冢大備闕文

秦觀謝館職啟

文章末技固非道義之尊箕斗虛名

祇取謗傷之速亟從引避幾至顛躋褒未就於袞華惡
已成於瘡痛三期之內王尊乍佞而乍賢七年之中魯田
一與而一奪 伏遇某官道欲濟時仁能錫類始憐貧

女稍分秦壁之光終念波臣爲激越江之水矧茲竒蹇
亦與甄收敢不以古人行己之方爲國士報君之義千
金弊帚聊依翰墨以自娛一割鉛刀或異事功之可立
宋洪邁賀黃左史啟 黑白既分丹青自炳聖朝舉無
缺事可少緩於箴規人主蔑有戲言正欲明於記注進

躋左城密侍前旒移疇昔皂囊剴切之誠示此日青史
簡嚴之筆侍玉皇之香案共欽稽古之榮築宰相之沙
隄佇究濟時之業

翟公巽謝試中館職啟

奉對西清凜天顏之咫尺

策名東觀近雲漢之昭回顧影自慚無顏以寄惟石渠
天祿之府秘金櫃玉板之藏翰林墨客之文章河圖洛
書之典訓怪如齊諧之所志微至稗官之所收極備至
於方言其流及於瑣語煨燼竹簡發羽陵汲冢之編科

斗漆書雙魯壁淹中之蠹蓋古人禮求諸野而史官學
在四夷僅有典刑誰云古昔仲尼之悼借馬猶及闕文
夏禹之尚遺聲以存追蠹自非網羅百氏之學貫穿千
載之文約六藝以成章洞九流之領畧孰能刪除繁穢
放輯舊聞得商頌十二篇考次逸詩之缺取武成二三
策緒正古書之遺至於晁幼婦之微文釋四蟲之訓纂
討論疑識辨岐周柎鼎之銘義證古文跡東漢顯陵之
策唯時遴選益歎才難 建章鳳闕望帝極之太微策

府玉山應星躔之東壁 乃眷蓬山世唯舊物慨流波
之未遠創風樹之纏悲再命及躬相望踵武惟先人嘗
掌斯事獲繼前修卒父業復總羣書啟期故實永言陟
岵之感終廢蓼莪之篇然以碩儒之熟訓詁而誤爾雅
之螾蜎大夫之識具教而名先君之獻武況乎淺陋無
乃滋疑庶幾農馬之專可與蟲魚之注述陶唐至於麟
止安所發明頌聖主之得賢臣或能論著

播芳大全賀劉內翰啟 功既成於授鉞命爰錫於

賜環不遠千里而見王果以一言而悟主精神夙契眷
注益深北門正內相之除南部領天官之長玉堂揮翰
日觀雲漢之昭回金殿掣鈴時近天威之咫尺爲命雖
資於潤色夫謨實賴於弼諧豈止發爲文章號禁中之
頗牧要當諫本仁義措天下於唐虞佇聞綸綍之放即
正鈞衡之拜

楊萬里賀章侍郎兼侍讀啟 衆僕九遷而未快自
乞一麾而遽行王尊之乍佞乍賢何有於我子文之無

喜無愠一聽之天公論以久而自明德望因退而愈重
宋陳耆卿賀真右史啟 楓宸渙號柱史升華峻直北
扉矯矯麻頭之健筆搗毫右陛英英簡上之清風疊組
孔嘉垂紳丕聳切以唐虞雖遠都俞具載於典謨班馬
不生筆削允資於記注折旋螭首咫尺龍顏必有襲六
爲七之功足載登三成五之治 賈生通達氣少和平
仲舒淵源言多迂濶惟我公之馨欬中有國之膏肓以
此猷爲必能袞鉞發揮神聖有公是公非之權判白奸

回無乍賢乍佞之感直聲九鼎正氣千尋

元袁桷謝閣學士啟 王言之制曰七史官之長有三風

動四方必訓詞之溫雅詔垂萬世在書法之簡嚴維班
馬之良不能繼獲麟之筆而燕許之體難以推倚馬之
才藝不兩能物無全美筆則筆削則削非曲學之可爲
見所見聞所聞恐直情而難致古有斗米而作傳近多
千金以致詞好惡成一己之私褒貶失當時之實掩長
卷以竊歎抱遺經而自娛故魏收以輕薄寡才咸稱穢

史王通雖隱淪不仕獨著元經方今偉績無前太平有
象大禮畧封禪之紀純誠汰郊丘之儀聲教萬邦文質
二代追皇猷創業之永傳丕基嗣服之初必屬鴻文以
揚駿德彰施作繪極妙巧於羣工雜比成音合天和於
衆耳拔犀之選非易聚毛之長亦難

唐顧雲謝下第後使人存問啟 優游仙苑泛泳天潢覆
錦高眠八花磚而讓寵會香視草五色筆以慙神

薛逢上翰林韋學士啟 優游仙暑偃息禁闈筆灑王

猷硯涵天澤成霖而雨露非遠吐氣而虹蜺坐舒

己上翰林

學士

王建上裴舍人度詩 小松窻對鳳池開履跡衣香逼

上台天意皆從彩毫出宸心盡向紫烟來非時玉案呈

宣旨每日金階賜對迴仙侶何因記名姓縣丞頭白走
塵埃

皇甫曾奉寄中書王舍人詩 腰金載筆謁承明至道

安禪得此生西掖幾年綉綉貴東山遙夜薜蘿情風傳

漏刻星河曙月上梧桐雨露清
聖主好文誰爲薦閉門
空賦子虛成

溫庭筠投翰林蕭舍人詩
人間鴛鴦香難從猶恨金
扉直幾重萬象晚歸仁
壽鏡百花春滿景陽鐘
紫微芒
動詞初出紅蠟香殘詔未封
每過朱門愛庭樹一枝何
日許從容

蘇頲投崔琳紫微舍人制
宜遷振鷺之行用集栖雞
之地

王丘授裴敦復中書舍人制 或學辯文鼠核綜兼於
隱蹟或詞握靈蛇光輝映於等夷

崔嘏授裴諗中書舍人制 自擢居內署掌茲制命謹
密無曠馨香有聞問對備見其一心敏捷共推其七步
况臧孫有後且聞得鳳之音枚乘多才雅蓄雕龍之妙
爰因滿歲授以正名

劉崇望授翰林學士鄭延昌兼中書舍人制 以爾彰
纓著稱夢筆爲文富以美才披其禁闥典由中之詔成

布下之言方謂得人雅當人侍蓋聞羊祜謀議是草皆焚
周仁重厚其言不泄親近之地慎密爲先爾既不能何
爽居外西省亦吾教誥之地戒之可矣

李嶠授太子舍人劉如玉等右史制 並言芳蘭芷行
溫珪璧或譽美銅樓或名高石室記言之重選衆尤難
宜收博辨之才俾居良史之任

蘇頲授崔銑起居舍人制 識遠心明懷才蘊藝缺碑
盡記亡篋不遺

崔嘏授崔瑤等起居郎制 載筆赤墀之下掌禮曲臺
之中注記行而鉛槧是資褒貶當而縉紳知懼顧茲所
職豈易其人

宋蘇軾謝中書舍人表 右史記言已塵高選西垣視
草復玷近班皆儒者之至榮豈平生之所望 詞命之
職古今所難非獨取之於文蓋將試之以事至於機務
亦或與聞雖四戶擅權非當時之公議而五花判事亦
前代之美譚及夫三字之除乃是一切之政但謂內朝

之法從安知宰相之屬官既任止於訓詞故權移於胥吏恬不知怪習爲故常先皇帝道冠百王法垂萬世建六官而修故事闢三省以待異人典章一新名實皆正遂申明於四禁俾分領於六曹遠則追直閣之司近則通檢正之任雖未聞政而聞事蓋須有德而有言如臣之愚無一而可草創潤色既非鄭國之材除書德音又乏唐人之譽忽當此選莫測其由將聖與仁能哲而惠雖在三年不言之際已有十日並照之光而臣日侍

邇英親聞訪道仰天威之甚近知聖鑒之難逃謂臣嘗
受先帝之知實無左右之助棄瑕往昔責效將來臣敢
不益厲素心無忘舊學上體周公煩悉之誥助成漢家
忠厚之文苟無曠官其敢言報

曾鞏謝除中書舍人表 甫上程篇遽塵寵仕載惟
遭遇倍集兢慙蓋聖君難諭之情將欲施於號令得當
世能言之士然後達於文辭矧今網理四方彌綸庶政
肇維新之王度備久簡之官儀計謀常越於拘擥注措

舉爲於希濶豈伊凡庶可測高深方當覺悟適遐使徧
知於上意訓齊內外用丕變於羣心尤資演暢之才曲
盡丁寧之旨布爲邦典茲謂人文顧在臣愚豈堪此選
敷導訓辭懼空踈之難強追參諷議憂膚淺之易窮
於風波流落之餘以蒲柳衰殘之質自循涯分曷副恩
榮雖日月之光何加於潤色而天地之德無待於論思
然臣素堅好古之誠粗識愛君之義既抗顏以就列敢
恕己以懷私謹當尋繹舊聞用闡揚於命令激昂懦志

庶補助於謀猷

李劉賀鍾侍郎除左兼中書及侍講啓 恭惟某官
目營四海曾著千年闕百姓於寸心不夷不惠而願孔
子之學掃千軍以獨筆非韓非孟而成歐陽之文雲雷
十載之經綸江漢六年之方泳怒鵬既擊凡馬皆空蛻
骨地仙直上蓬萊瀛洲之島影纓天策偏儀承明金馬
之庭堯釀舜醺最宜爲誥班香宋豔安敢比材非道不
陳於前在庭無出其右日獻月納亦有嘉謀年除歲遷

士無異論四輔既備命史佚以記言五禮有庸咨伯夷
而降典露門重席星戶鳴珂緝熙有賴於仔肩左右宜
咨於汝翼掌六典之貳更追裴馬之蹤遂萬物之宜即

接夔龍之武

已上中書舍人

唐崔淑授裴諗知制誥制 生而有文弱不好弄中蘊明

敏外涵清和藹乎君子之風蔚有賢人之操自擢昇翰
苑入侍禁闈動必知機靜而適道大玉之韻清越以長
小山之姿貞芳自茂是用資其粉澤演我絲綸斧藻方耀

於鳳銜揮灑更期於鴻筆

常袞授庾準楊炎知制誥制 詔令之重潤色攸難其
文流則失正其詞質則不麗固宜酌風雅之變參漢魏
之作發揮綸音其在茲乎

常袞謝知制誥表 五字非工四年待罪禁垣之右朝
奉如綸宸扆之前夜參視草以地尤密惟才必精在臣
無堪忝跡斯甚食浮之議所責何逃 翱翔雲霄沐浴

雨露

宋歐陽修謝知制誥表 伏以王者尊居萬民之上而誠

意能與下通奄有四海之大而惠澤得以徧及者豈惟
號令誥詔發揮而已哉然其爲言也質而不文則不足
以行遠而昭聖謀麗而不典則不足以示後而爲世法
居是職者古難其人乃以愚臣而當此選伏惟皇帝陛
下茂仁聖之姿荷祖宗之業日謹一日曾未少懈而自
羌戎負固邊鄙用師勤儉率先於聖躬焦勞常見於玉
色雖有憂民之志而億姓未蘇雖有欲治之心而羣臣

未副故每進一善則未嘗不欲勸天下之能每官一賢則未始不欲盡人材之用雖以爵祿而砥礪尚須訓誡之丁寧尤假能言以諭至意可稱是者不又艱歟伏念臣雖以儒術進身本無辭藝可取徒值向者時文之弊偶能獨守好古之勤志欲去於雕華文反成於樸鄙本懼不適當世之用敢期自結聖主之知陛下獎之特深用之太過此臣所以懇讓三四至於辭窮而天意不回寵命難止尚慮頑然之未諭更加使者以臨門思出非

常理難屢瀆及俯而受命伏讀訓辭則有必能復古之
言然後益知所責之重夙夜惶惑未知所措伏以文字
之職廁於侍從之班在於周行是爲超擢不徒揮翰以
爲効自當死節以報恩惟所使之期於盡瘁

已上知
制語

歐陽修謝復龍圖閣直學表 再念臣稟生孤拙本乏
藝能徒因學古之勤粗識事君之節苟臨危効命尚當
不顧以奮身况爲善無傷何憚竭忠而報國

陸游賀台州曾直閣啟 歷考平生追配古人而奚

愧中更俗吏益知儒者之有功比由直館之宴閒起奉
中臺之委寄翔而後集泛然敢辭子房避三萬戶之封
曼容至六百石而去當寧爲之太息舉朝仰其高風

楊億賀刁秘閣啟 羣玉之府圖籍攸歸承明之廬

俊賢所聚自非兼該文史洞達天人擅博物之稱負多
聞之益則何以掌蘭臺之秘記辨魯壁之古文克分豕
亥之非榮對鬼神之間允資鴻博式副選掄

職官部

官僚

唐蘇頲授唐休璟太子少師制 私第懸車耆年益壯公

門軾馬朔見逾聞求舊所期懷賢是切諭於三善况待
正人營於百工孰過元老宜紆几杖俾作鹽梅

白居易授嚴綬可太子少傅制 東朝保傅歷代尊崇
漢擇名儒任先疏廣晉求耆德選在山濤實資六傅之
賢用弘三善之道

蘇頲授韋嗣立太子賓客制 鑒測毫端詞詮象外昆
弟承一經之業登相者代不乏人閨門有萬石之風立

言者士是則效疇咨滿於故事潤色敷於令典屬以疾
辭用體張良之志資於德舉宜從綺季之遊

孫逖授賀知章等太子賓客制 衣冠耆舊詞學宗師

或恬淡風流獨擅東南之美或清貞介特是稱江漢之
英負當朝之令名有錫類之純行頓令教導久侍藩維
善利則多寵章宜及方之四老用列賓友之班綜彼三
墳俾在圖書之府

常袞授嗣吳王祇太子賓客制 文昭之慶蔚於公族

楚元之後繼有忠賢

李嶠授王方慶左庶子制 昇降銅樓輔弼玉裕必求
時望以隆國本 體溫恭之性造次不違守廉退之風
終始如一實舊德之明允見通人之老成昔張良以三
傑之才始傅儲右史丹資八舍之重方護春宮簡賢任
能抑有前事宜膺九德之選用光三善之才
蘇頲授韋抗太子左庶子制 可以發揮夏籥光踐春
華宜從綺季之遊益重王商之拜

李嶠授于復業太子中允制 銅樓俟俊銀榜翹賢漢
水觀風且鞞彤檐之務瑤山聽樂宜煦黃離之景

又授相王男成器太子左贊善大夫制 毓彩桂山承
規椒掖韶容霞舉美志月將望苑翹才瑤山佇俊宜參
多士之選俾從正人之列

又授吳昇太子左贊善大夫制 悟理明達用心微妙
博以才藝精於談吐西園月上亟聞飛蓋之篇東陸春
歸宜聽鳴笳之響

又授竇元泰太子洗馬制 觀津之榮累稱外戚伏波
之訓方裕後昆可勸導宗黨儀刑門族俾登洗馬之秩
罔忝濯龍之戒

又授柳沖兼溫王師制 族茂汾鼎價珍垂壁雅負通
才備聞遺訓探六經之奧如叩鴻鐘窮百氏之源若披
明鏡扶輿切問侍從增榮擁篲崇儒師資佇德

薛廷珪授太子賓客王牘等諸王傳制 明君臣父子
之道知禮樂詩書之源可使高步承華入參望苑琢磨

羽翼朕有翼焉或授正卿或加峻級宜旌優異往傳童
蒙邪蒿鮑魚勿俾登俎宵筵講肆爲惜分陰使其知東
平爲善之規喜王褒洞蕭之賦承萬代之業固磐石之
基斯賴於老成人也

元稹授郭皎冀王府諮議制 材任爪牙姻連肺腑領
轅門之右廣假桂苑之元僚夙著威名嘗頒勇爵元戎
啟狀慶澤覃恩宜輟豹韜之雄以資鴈沼之畫

蘇頲授崔子源岐王府長史制 地緒清茂風襟亮拔

有如繩之直懷匪石之心學不爲人文能飾吏憲曹白
簡秋隼曾飛禮闈青縑晨鳧就列

又授王守廉申王府長史制 俾璫筵之茂寵參碣館
之元寮

元稹授薛昌族等王府長史制 河山在念肯忘獎勞
藩邸求才實思高選昔阮孚以嘯咏自樂龐秀有忠烈
可佳更任王宮咸稱國器今之榮授其在茲乎

宋播芳大全吏部侍郎恭太子詹事制 太子乃天下

之本而賢者爲邦家之基思得直諫多聞以爲益友庶
幾左右前後罔非正人故茲一時端尹之臣率用兩朝
髦俊之選

齊孔稚珪讓詹事表 太子霞騫青殿日晃春宮駕紫
谷之英振洛笙之響自非器上白雲韻同明月何以延
芳芝苑插羽瓊條竇嬰戚貴於西京陸曄風素於東國
伊人之美方曰可舉臣亦何斯而敢忝冒也

陳江總謝宮爲製讓詹事表 如攀珠樹徒仰照匣之

輝若踐玉田不知照廡之價芙蓉之水亟奉北園迷迭
之文屬陪南館久降噓枯之旨許賜凌雲之筆清夜讌
斯謂言善戲黃金然諾並遂珠寵年齊柏寢豈報恩榮
紙罄蘭臺未書悚戴

宋汪藻謝除太子賓客表 儲闈肇啟當收卓異之才

詔綍中頒首玷高華之秩既預論思之秘仍參調護之
榮承命便蕃撫躬跼躄伏以三王之教世子必用正人
兩漢之詔宮僚無非碩學矧在賓筵之列尤爲儒者之

光方朝廷新曠古之儀俾世嫡正前星之位養德茲始
求賢實艱尚虛六傳之聯先遴十人之選如臣膚淺非
國俊髦司典謨訓誥之文猶孤眷倚豈父子君臣之道
能有建明弗獲固辭終慙非據 敢不益懋嘉猷誓堅
晚節密爲羽翼當如園綺之賢徒事文詞敢效應劉之
陋

又除詹事謝宮啟 庇身修德濫迹端形陳蘿故葛攀
附不涯解角蛻鱗超踰非次方辭璽會覬收渥澤

梁簡文帝庶子王規墓誌銘 玉挺藍田珠潤隨水價

重連城聲同垂棘偶應龍之籥影等威鳳之羽儀名理
超於荀王博洽侔於終賈稍遷侍中佩玉璽於文昌珥
金貂於武帳文雅與綺縠相宣逸氣並雲霞俱遠副君
取敬杜夷時迴晉儲之駕追嗟徐幹亦降魏貳之書爰
發睿辭爲銘云爾七略百家三藏九部成誦於心談天
其口勝氣無傳高塵誰偶榮珪掩采靈劔摧鋒宋郊淪
鼎洛水沉鐘玄扉不晝幽夜恒冬

職官部 六官

唐白居易授鄭綱吏部尚書制 昔魏用崔琰毛玠典吏
曹一時之士以廉節自勵國朝宋璟李義掌選部亦能
過絕謁託振張紀綱官無古今得人則理吾言及此欲
爾繼之

錢翊授劉崇望吏部尚書制 來整軒裳再提衡鏡山
公密放更廣規模楚客騷離休勞諷諭

蘇頲授盧藏用檢校吏部侍郎制 風塵之外獨秀瑤

林清白之中常懸冰鏡自四年掌誥九品作程峻而不
離重輕咸當簡而能要浮競斯遠刀尺之委銓衡已歸
特選周才更符僉望

常袞授楊綰吏部侍郎制 三揖而進能守謙光一命
而僂不忘恭敬 當勵濯纓之操不遺刈楚之才

孫逖授陸景融吏部侍郎制 恬淡之性足以抑退浮
華微明之識足以激揚淹滯類能而使僉議允屬俾澄
清於九流期風俗之一變

崔嘏授韋博等司勳郎中制 頃以邊城命將肇建麾
幢當警塵未息之時及烽火向明之日故於粉署妙選
星郎欲以贊充國屯田之謀佐武賢備戎之術既而賓筵
有耀幕畫已多荐居於沙漠之中爰舍於戎旌之下亦
既勞績亟更歲寒念其裹革之誠更復握蘭之美

又授馮韜等司封員外郎制 分列宿之位應覆被之
榮八可以封還詔書出可以分領符竹優游於粉署之
內談笑於錦帳之前苟非清才不在斯選以韜文章炳

煥獨步詞科以同靖門胄光華深通聖典荆玉韜含章之美霜鍾蓄待扣之音是用升彼名曹擢於芸閣

蘇頲授裴耀卿檢校考功員外郎制士行純密文詞典麗時人許其清秀職事推其綜核惟才是舉方憑止水之明在位斯聞佇考觀光之彥

梁沈約爲褚炫讓吏部尚書表竊惟玄素未辨必謬朱紫之察規矩或昧理喪方圓之功東西兩漢左雄孤絕於前南北二晉山濤莫嗣於後良由性藏於貌才隱

乎心楚越無以況其迥殊山川未足方其險阻雖復拂
暗爲明勉愚生智亦何以登竒拔異離渭分涇

張纘讓吏部尚書表 漢革民曹魏仍東掾毛孝先以

清公見美盧子加以貞固任職降及晉代希覩其人樂
彥輔雍容自守當時恨其寡譽山巨源意存賞拔不免
與世浮沈鄧攸牧馬家庭何益止競之操卞壺如含瓦
石未聞檢裁之功

王筠爲第六叔讓重除吏部尚書表 臣聞剽犀截鴈

必俟昆吾之鋒逐日追風信資伯樂之駿未有駢駕蹇足而方騁遙塗採藝鉛刀而求其斷割伏惟則哲爲體事艱歷代明別攸寄義重前王必使玉石薰蕕區別靡雜涇渭玄黃條流不爽自非伯豪之天下稱能仲子之時人歸德孝先之拔真抑僞巨源之黜惡舉善然後可以銓鏡流品平均衡石

王僧孺讓吏部郎表 臣生輕飛箝品細躩壤寂寞州

閭取淪室實不自求於善管寧許人以能官從班隨牒

自安疎遠豈望翰飛終知跡滯一逢浸漉幾聞昭晉假
拙爲心變竒成偶寧爲天覆地長復與雨露相滋秋成
春發必如暄寒無與自變泥塗多超嵩鄧屢考固其北
越在累誠於可聞方愧朱紫永惜鈞衡固惟許李終非
王畢取其清尚固所經企求之碎密寧可庶幾

唐李嶠爲李景湛讓天官尚書表 鏘金鳴玉坐榮枯

朽擊水搏風顧慙腹背自忝司衡鏡亟積一作星灰雖

智力已窮而清通未効朱紫多紊涇渭莫辨宜其抵罪

觸網稍清官謗翻乃假寵增服更垂天獎是用荷恩內
訟以榮爲憂且夫八座位隆五曹望重典南宮之喉舌
象北斗之樞機式資藻鑑奚綜賓實自非孝先亮直彥
輔公忠山濤之簡靜篤素顧譚之心精體密何以對揚
天哲厭塞人望

獨孤及吏部郎中廳壁記 楚金百鍊顏

集作
說

弓六鈞

已上
吏部

唐中宗授李承嘉戶部尚書制 門下紫極八座非德

勿居丹屏六曹惟賢是擇金紫光祿大夫李承嘉靈襟
峻嶷識宇嚴明早聞道德之名夙有大臣之望雄才逐
日共騏驥而齊驅迅翼搏風與鵷鴻而並翥柏臺憲府
高膺弄印之榮芝甸神州獨著題輿之任堅同白玉直
若朱繩臺閣生風權豪氣懾洪才可重茂秩須崇宜加
曳履之班式獎從橋之對

蘇頲授畢構戶部尚書制 器無不綜含清明以見微
言有可觀負忠謹以居直百郡仰其成績三臺推其故

事頃者任殷河尹聲滿洛師姦豪懼秋霜之威孤老懷
冬日之愛故可辨於五物書以萬人誰其釐之俾爾作
則

孫逖授裴寬戶部尚書制 蹇諤之用累鷲鳥而莫當
操割之能斷犀革而何有亟登臺閣嘗擁旌旄禮樂爲
從政之文德刑是戢兵之武雖地卿所掌實佇通才而
天憲惟艱尚資兼領

李虞中授學士王源中戶部侍郎制 天籟無器大球

不磨範圍可以程縉紳刀尺可以制度量自拔於郎署
寘諸中禁嘗因進見敷奏以言揖黃憲而鄙吝不生覩
汲黯而風神自整

元稹授高允恭戶部郎中判度支案制 大比生齒之
書仍掌圻毫之牘戎車方駕物力未豐剖滯應期斯任
不細

劉禹錫授

開

倉部郎中制 周制倉人以辨於邦用

廩人以待乎匪頒後代或均輸或平糴皆周官倉廩之職

也於戲王者藏於天下吾何私焉收歛以時儲蓄必謹俾
夫凶荒無患貧富克均宜詠京坻之詩勿守豆區之限
唐李嶠讓地官尚書表 臣少無竒志長乏異能短步
非疾於駢駟翺飛自同於燕雀逢聖神之再造屬天地
之兼容鄭璞齊竽竊混聲價秦冠漢綬叨踐名級步鶯
池之清切陟鸞渚之便蕃出入五臺周旋三閣行膺負
璽之任遂服專車之寵萬機損益蔽於庸陋之心百揆
謨猷滯於膏肓之疾爰發皇揆特留宸眷假優閒之秩

雖入杏壇參翊亮之謀尚和梅鼎徒延舟楫之舉竟微
股肱之效挈瓶之智患在於空虛瞰室之災懼深於盈
滿方陳骸骨之情遽荷雲霄之命負乘之責前謗未除
忝越之譏後恩仍及還振蜉蝣之羽欲參龍鳳之行赤
紱妨賢物知不可素食得位臣亦胡顏况八座樞機五
曹要劇上儀七星之象旁理萬邦之教自非元凱之明
允忠肅陳韓之敦樸淳深將何以釐正版圖擾安邦國
臣之淺狹誠則貪叨朝有典章敢叨非望伏乞迴乾坤

之曲澤收雨露之殊私廣訪訃謨詳求棧樸更引食場
之彥俾臨均土之司則受任得才無愆振鷺之美官方
有序不失貫魚之次

已上
戶部

鄭處誨授鄭薰禮部侍郎制 總百郡之俊造考五禮
之異同必求上才以允僉屬 高陽茂族通德盛門秉
莊氏之風規蘊名卿之器業文諧騷雅鼓吹前言譽洽
縉紳領袖時輩操守必修其謙柄進退常踐於德藩疊
中詞科亟升清貫持橐列金章之侍揮毫擅紫闥之工

貳職冬官克揚休問是用俾司貢籍以振儒風朕以化天下者莫尚於人文序多士者以備乎時選育材之本惟善是從擥拔既尚於幽貞聳勸勿遺於曹緒無求冠玉無採雕蟲當思取實之方必有酌中之道

劉禹錫授

闕

主客郎中制

漢制尚書郎四人一人

主營部成帝又署客曹主外國戎狄事皆今主客之任也其後或東西列職左右分名統彼行人之家綏其外臣之務朝聘則定位宴會則辨儀穆我四門深於九譯用委

藁街之政克資粉署之賢

薛廷珪授徐彥樞禮部員外郎制 澹以立身謙而履

道情田萬頃瑤林將玉樹森羅文律九成調露與承雲
交奏動必由禮人無間言克承德行之規不染脂膏之
態

常袞授張謂禮部侍郎制 貳宗伯之掌禮典諸侯之
貢士

白居易授韋貫之禮部侍郎制 可使典禮以和神人

可使考文以第俊秀

李嶠為司禮武卿讓官表

但禮秩

一作宋

之職歷選

所難苟非得賢於何求化西京置一十二列首貫金吾
東漢有三十九人多遷玉鉉妙擇時望將以洽神祇博
採列侯所以重宗廟桓榮之經學始展今恩孫通之禮
儀方膺此命在臣無取遠謝古人將何以載玄冕之七

旒驅素

一作亦

車之十束

李嶠為定王謙兼知司禮寺事表

臣本無操履素乏

藝能憑藉葭莩遂叨冕笏畫龍刻鵠非有天才簪犀紐
龜但因地勢鑿空虛微眇之質驗庸闇不逮之姿素簡
神衷豈勞銓叙幸得攀光日月藉寵侯王祿比萬鍾爵
窮五等備梁園之車服司周室之典經朝夕起居出入
陪奉在生多幸於臣已足豈可重叨非據更竊隆班上
虧國章下速身謗昔漢疇稷嗣將冠九卿虞昇伯夷實
掌三禮奉烝嘗祈祀之典有匏土笙鏞之節匪徒移風
易俗兼且尊事神祇豈於凡庸所可參議

宋陸游賀禮部鄭侍郎啟 恭惟某官好是正直擇乎

中庸大冊高文固已寫之琬琰崇言鉉議皆可質於鬼神殆將與日月而爭光奚止當雷霆而獨立惟上聖克勤於聰鑑察羣臣各盡於才能謂其代予言既久煩於鴻碩求能典朕禮宜無易於老成況以南省之要司仍寓西垣之舊直惟時異數實冠清途然而文闕國之盛衰官以人而輕重顛俊尊上帝豈止在玉帛鐘鼓之間歛福錫庶民其必有典謨訓誥之盛視古無愧非公而

誰所冀復如三代禮樂大備之時抑亦追還兩漢文辭爾雅之體顧雖老矣尚及見之

唐張鷟禮部判 典朕三禮大舜委於伯夷分教六卿成王任於彤伯建茲歲首實曰春官敦叙九族之親欽若五常之教祀天郊地之典舉其宏綱朝日夕月之儀撮其機要

蘇頲贈禮部尚書褚公神道碑 化益淳儒益信則郊廟有典賓軍有容發揮牲玉斟酌犧象必咨焉度焉上已

禮部

蘇頲授張仁愿兵部尚書制 有將相之才樹忠公之
績入稱三傑帷幄所以運籌出摠六師塞垣由其卧鼓
懸利器而御物自中於桑林推素心以得士更成於李
徑故能居室而應在邦必聞洎養疾歸休辭榮及禮用
旌渭濱之兆空想潁陽之問乞言繫賴寵德攸宜佇增
題劔之榮更遂揮金之樂

錢翊授陸扆兵部尚書制

執政雖新犯顏已急我則

有違蹇叔爾詎不如王陵剖竹遂行伏蒲未足還好爵
而來惟辨色掩閒門而退乃韜光

蔣廷珪授劉崇望兵部尚書制 云罷鈞軸亟移光陰
室既生白舟惟任觸浩然正氣充塞乎天地之間卓爾
神光瑩徹乎星辰之表琴樽遂性名教檢身

孫逖授張均兵部侍郎制 修身自達擅鴻陸之羽儀
泣事無難有龍泉之斷割

賈至授趙良弼司庫員外郎制 元戎起行師出以律

將謀韓厥之職宜選子方之智俾登仙署仍佐中權

李嶠爲歐陽通讓夏官尚書表 臣識量凡淺志業空

廢乏刀筆之吏能無俎豆之經術徒以積勞爲忝久宦

成資承日月之末光霑雨露之弘貸丈二之組每慙於

假竊尺一之制更獎於庸微俛仰慙惶屏營反側夫以

天臺峻密帝猷殷曠端揆隆於八座樞衡總於萬機非

夫賢才孰能綜理况周官司馬有甲兵之職漢服珥貂

兼喉舌之任歷觀前載此選尤難安可以擣櫟散才瓶

筭小器比德陳劔差蹤鄭履豈無慚於謬寵實有懼於

妨官

已上
兵部

蘇頲授李入刑部尚書制 恒碣之寶衣冠之華業摠

四科才抱九德爲邦理要洞入精微當代詞雄居成準
的忠義得在公之體清修稟行已之用紫泥掌誥雖密
王言黃沙定罪是懸人命眷茲欽恤尤賴簡孚

孫逖授裴敦復刑部尚書制 誠無不通俎豆兼於軍

旅行有餘力文學資於政事頃者巡撫江徼肅清姦宄

太叔之謀既能止盜穰苴之法亦在安人功實簡心賞
宜超等委之刑柄俾踐白雲之司錫以身章更增金印
之秩

陳子昂爲司刑袁卿讓官表 臣聞王者敬懼愆在典
刑天下取平允茲廷尉苟非其人法不虛行 伏見某
官某乙弱冠登仕早有能名每以清白洗心不爲寒溫
變節誠使榮加天寵職察雲司必能利用文明哀矜庶
獄弼成五教無謝於堯臣載光三典允諧於周議

宋播芳大全除刑部尚書謝表 班固志刑法兼存兵
甲之繕修臯陶作士師曰惟寇賊之姦宄蓋二者相爲
表裏而四夷正賴鞭笞乃咨分閭之臣與聞司臯之事
繫此責則重矣非其人而謂何

唐張鷟判 國之二柄在德與刑邦之三典惟清與慎大
舜有欽恤之言穆王有哀矜之教爽鳩之爲司寇矜在
澤人臯陶之作士師明於政理

李洞感知上刑部鄭侍郎詩 寄掩白雲司蜀都高卧

時隣僧點寒燭宿鳥動秋池帝誦嘉蓮表人吟寶劍詩
石渠流月斷畫角截江吹閒出黃金勒前飛白鷺鷺公
心外國說重望兩朝持淨鮮斜圭影孤牕響錫枝興幽
松雪見心苦硯冰知緣文蟲聲切過門馬足遲漏殘終
卷讀日下大名垂平磧容鵬上仙山許狃窺數聯金口
出死免愧立為

周庾信余綿永神道碑 三度有星名天獄八卦有坎
象刑書公繁不秋荼嚴無夏日民知約法未肯以獄吏

為尊吏職刑名無敢以死灰相懼

已上刑部

唐中宗授張錫工部尚書制 白虹良寶紫電雄鋒家

傳鵲印之祥世襲貂冠之緒文道吐鳳思縟騰蛟質映
南金材逾東箭自提網左轄立惟中臺奏郭奕而無慙
射崔洪而不愧紫樞佇俊彤管須賢宜升賜劍之榮式
表委珠之潔

蘇頲授劉知柔工部尚書制 司空之職以平水土常
伯之任尤重臺閣 文詞有綺績之工望實有珪璋之

譽出膺賢守則郡國循良入位名臣則衣冠準的可謂
朝之明哲代之純懿俾遷榮於北斗宜作範於南宮

元稹授羅讓工部員外郎制 昔陶弘景一代高人始
願四十為尚書而猶不遂國朝選署尤用其良以爾讓
敏而好學直而能溫甲乙亟登班資歷踐項將軍辟士
權資孫楚之坐籌今會府掄材復獎馬宮之射策無忘
辨護以宣程品日省月試用勸百工

蘇頲授王琪水部員外郎制 奕代儒雅門傳教義風

襟育粹詞韻含清雖職尚安卑而才方致遠連枝席寵
爰睽於棣華起草升榮俾光於蘭握

黃疇若賀工部劉尚書啟 恩綸拜寵起部升華帝曰
疇若垂哉擢典汝工之職漢廷誰如卿者遂陞常伯之
班朝登偉人士載嘉頌恭惟某官天球不琢玉井無波
學有淵源倒彭蠡三江之勢事無盤錯倚豐城雙劍之
鋒早登名躋休有華問處憲府抨彈之地得勉益尊立
延英諫議之班如尊乃勇懋展經綸之業見謂通明之才

信湖山之炳靈有槐鼎之相繼爰膺眷命申畀彝章出
納居喉舌之司拔巧陋元成之世聖人作百工之事政
少藉於研思文昌峻八座之躔行即參於駿假

張鷟判 位當玄武之官職在司空之任虞舜之代伯

禹統其班周成之朝毛公處其地

已上
工部

職官部

列卿

唐蘇頲授韋希仲宗正卿制 以醞藉之姿中折旋之
禮趨事端雅吐詞雄暢束帶立朝既副聲實彰纓在位

迭居文武宜輟魚鈐之委叙於麟族之盟

右宗正寺

又授韋元珪通事舍人制 占對閒詳風規韶茂鸞庖

分職已命膏梁之緒鸞墀敷奏佇揚賓客之言

又授韋振通事舍人制 良玉蘊價明珠耀彩宜擢才

於金穴俾趨侍於瑤墀

已上通政使司

梁沈約授蔡法度廷尉制 民命所懸繫乎三尺止殺

除殘實由乎此是以臯陶作士五刑惟明于張莅官世

無冤獄且漢代律書出乎小杜吳雄以三世法家係爲

理職郭恭以律學通明仍業司士爰及晉氏此風未泯
叔則元凱並各名家自茲厥後斯尚漸薄迄至於今捐
棄頓盡衣冠士子耻復用心州郡姦吏恣其取舍舞文
弄法非止一塗朕膺天受命爲兆民主每一念此忘寢
與食尚書刪定左曹郎中蔡法度少好律書明曉法令
世之所廢篤志不怠至於章句踳滯名程乖礙莫不斟酌
厥衷允得其門方欲寄以國刑開示後學拔才取士
豈有定方自世道澆流浮僞雲起量計多少辯校錐刀

若遵往從舊守而勿失豈所以軌儀上世垂風於後宜
加褒擢弗繫常階

唐蘇頲授陸餘慶大理卿制 早回翔於近密久踐歷
於中外雍容文雅自然素徵清商蕭散風華莫不瑤林
瓊樹必當和而不撓貞則有恒正罰金於後人戒刻木
於前吏念茲欽恤深可哀矜宜修白雲之典俾靜黃沙
之職

已上大
理寺

常袞授揚綰太常卿制 舜以伯夷作秩宗漢以列侯

掌郊廟至於圓丘大射之制禮官博士之論莫不綜詳
得失而折衷焉故事職尊冠九卿之首 恭儉忠信守
而彌固一時模表清議所高固可以處揚震桓榮之位
領曲臺司宗之重勉思厥服以稱任賢

李虞仲授崔羣右僕射兼太常卿制 出作垣翰入標
羽儀風雨有不已之鳴雪霜無可變之色秉是全德罔
聞異辭乃者輟自夏卿授之戎閫統荆衡之巨鎮嗣羊
杜之前聲政推洽平理在徵復禮樂之器予心所難與

流合雅之音將考依經之制慎簡斯職僉諧乃俞俾迴
軍旅之謀式暢人祗之職伯夷官業佇乃修明

蘇頲授陳貞節太常博士制 卞寶輝光楚材翹秀窮
禮經之典博踐詞律之風雅參名列侍每獻昌言掌事
奉常宜銓令典

梁陸倕爲王光祿轉太常讓表 昔者楚德方盛孫叔
濯衣漢道克隆王陽結綬故受命無辭受爵不讓况宗
卿清重歷選所難漢晉以降莫非素範辭爵則桓郁張

奮讓封則丁鴻劉愷潘尼之文雅深純華歆之從容退
默自昔迄茲風流繼軌以臣況之曾無等級

陳沈炯爲周弘讓太常表 臣聞玉舄雕楹不取材於
蟠木丹朱繡黼豈襲冕於蘿薜何則適用各有所宜朝
野不可一旨叔孫之分定禮儀倍資典實刁協之躬爲
唱引豈易其儀賓主闕對封禪失儀責以司存云誰之
咎况南史執簡轉見違才君舉必書尤難妄冒

唐高郢謝再除太常卿充禮儀使表 臣聞秩宗之任典

司三禮奉常之選班列九卿前古以來用人爲重非有
望實不宜謬居臣昔叨此官已積負乘之懼今復再
歷倍增濡翼之憂况專職禮儀別蒙委遇明時大禮方
奉郊禋末學謏聞何徵損益

錢翊代戶部孫相公謝授兄太常卿表 陛下禮行舟
楫念及墳簞慰其友愛之懷進以優崇之秩伏以九卿
之位列代所尊舜以三禮命伯夷漢以奉常加稷嗣依
古則重得人始光用典之難敢言兄氏方懷慙惕忽荷

皇私而階峻銀青寵兼端揆喜溢在原之屬恩加當軸
之臣既激弼諧且弘名教股肱作輔莫成鎮撫之功手
足相須但有胼胝之誓

漢揚雄太常箴 翼翼太常實爲宗伯穆穆靈祇寢廟
奕奕稱秩元祀班於羣神我祀既祇我菜孔蠲匪愆匪
忒公尸攸宜弗祈弗求惟德之報不矯不誣庶無罪悔
無曰我材輕身恃筮東鄰之犧牛不如西鄰之麥魚秦
殞望夷隱斃鍾巫常臣司宗敢告執書

已上太
常寺

唐蘇頲授房光義光祿卿制 雅容端操惟玉有溫擇行

踐言復珪無玷頃祗班序尤稱望實蘭猗趨職已伏於
誰何拍梁賦詩俾聞於總領

劉崇望授李授光祿少卿制 勉幹吉蠲之職無忽裡

祀之官

又為武奉御謝官表 臣聞瑤庭任切猶稱六尚之榮玉

食禮尊實總八珍之貴臣術慙祿鶴業匪豢龍將何以

致美瓊芳式和金鼎

已上光祿寺

蘇頲授王希雋太僕卿制 登於副尹聲滿於宇人試
乃列卿眷踰於數馬中車是屬建鼓攸司

薛廷珪

關

授太僕卿制

昔周穆王命伯冏為太僕

正曰昔在文武聰明齊聖侍御僕從罔匪正人以承弼
厥辟且曰僕臣正厥后克正僕臣諛厥后自聖太僕之
為官也重矣朕每讀書允擇其可矧惟前代畢用名臣
數馬執綬故實具在為予禦侮作我前驅審官擇人今
以命汝稽諸訓誥得不勉之

漢揚雄太僕箴 肅肅太僕車馬是供銜銜和鑿駕彼
時龍昔在上帝巡狩四宅王用三驅前禽是失紂作不
令武王征殷檀車孔夏四駮孔昕僕夫執絳載駢載駟
我輿云安我馬云閑雖馳雖驅匪逸匪愆昔有淫羿馳
騁忘歸景公千駟而淫於齊詩好牡馬牧於坰野輦車
就牧而詩人興魯廐焚問人仲尼厚醜孟子蓋惡夫廐
多肥馬而野有餓殍僕臣司駕敢告執卓

唐楊炯後周明威將軍梁公神道碑 識高東野職參西

極勵銜策而追風逐日加剪拂則絕電奔星駛馱將駙
駉齊衡驥騮共駟駮伏櫪於是龍媒間出麟友挺生伯
樂多謝於精微日碑有慙於秣養

張九齡太僕卿王君墓誌 買臣還郡無矜於出綬張

既本州是榮於衣繡 訓以六駟正於君 疑僕日加數

馬之慎歲有展軫之勤

已上太僕寺

常袞授蔣渙鴻臚卿制 朕方修文德以撫區外則重

譯象胥之事九儀相贊之職正用髦碩俾之典領 時

屬四夷之叙參授大賓之任韓暨以宿德而拜陳紀以
至行而遷求舊任賢正當此選

李嶠為崔神基讓授司賓卿表 自謬司六尚承乏九
賓星瑄驟移塵露無紀每懷忌滿之誠實負曠官之責
寧可以更奉殊徽重叨非據當象河之顯列處惟月之
崇班陛下刻象琬金焚山榜道維駒在詠異人並出無
容使芳蕙為蕭康瓠成寶

孫逖鴻臚少卿壁記 帝唐亮采立政稽古命官柔服

遠人綏厥有衆肅慎來賀渠搜即叙示之以干羽通之
以冠帶允諧是職豈易其人非夫野王之政理玄成之
經術德孺之明識元方之令望則曷由臻茲

已上鴻臚寺

蘇頌授韋玠司農少卿制 盛禮興樂望雖重於執珪
八政一農事尤殷於理粟况洛京轉漕淮海通波宜任
牟融之能遷改鄭莊之弊

晉張華大司農箴 家有廬井王有廩籍阜茂豐物和
鈞關石在周之季不虔政首棄穰弗務不籍千畝墮神

乏祀敗於戎醜穡臣司農敢告左右

唐楊炯後周青州刺史宇文公神道碑 奏稱內史漢曰

司農管夷吾陳不洵之名耿壽昌立常平之議時播百

穀后稷讓於虞書阜成兆民列卿拜於周典

已上
司農

蘇頲授鄭孝式衛尉少卿制 詢事可以樹風聽言可

以從政韜戈之任衛戟是司俾移名於白簡宜亞寵於

丹棘

右衛
尉寺

蘇頲授李從遠守太府卿制 膺河寺之秩寵選方高

致泉府之殷惟才是屬 學仞山高詞場雲鬱闕里之
室動不違仁潁川之門居而會理

白居易授裴武太府卿制 聚九州之賦辨百貨之名

按其度程謹其出納孰爲主者外府上卿有通敏之識
有倚辦之才以茲器用早膺任使小大之務罔不勵精
累有勤績存乎官次 爾宜率其官屬欽乃職司會帑

藏出入之要修權量平校之法

已上太
府寺

孫逖授牛仙客殿中監制 長才爲萬里之城沈畧乃

百夫之禦項持節鉞嘗鎮河湟兵器惟精邊人咸賴出
則靖國方資五利之功入則訓駟宜修六尚之職

李嶠爲第十舅讓殿中監兼仗內閑廐表 臣本乏才

藝素無操植徒因緒業獲齒簪裾屬兩曜重光三靈再
造登山捧日始會於風雲涉海窺天遂攀於星漢位非
德進榮以恩昇出捧鷹鑣驂玉輿之式道入陪鳳宸預
金門之通籍危清切之嚴衛接綢繆之宴私丘山之恩
徒慚冒忝絲髮之効竟知無補加以兼烏竊幸假鳳連

棲弟兄分侍於閫闈甥舅齊蹤於樞秘光榮被於九族
寵遇傾於百寮是以常誠滿盈亟慚尸素叔寶之遇武
子雖願輸忠正禮之對山公唯憂曠職常思高明之瞰
室每懼平路之傾軻豈謂天道不貲聖慈逾厚仍降非
常之澤重紆加等之命妨賢受位多慚於鴛鴦之羣匪
服叨榮實愧於蜉蝣之羽竊惟先王慎擇不進於凡庸
明主虛求務延於才俊伏乞傍羅杞梓更詢棫樸必取
尤能秀傑方爲御府之臣無使五技輕姿謬處七閩之

任自然六尚增價七駟無忝納於百揆終無廢事之譏
賓於四門必有得人之頌

宋之問爲田歸道讓殿中監表 臣聞欲成大廈必寄
於瓌材將適遠途理歸於駿足未有闕公輸之巧輒事
揮斤無良樂之能謬令市骨再趨武禁誠恪未聞三入
文昌涓埃莫効剖符爲郡山東無勿剪之謠握節和戎
漠北有不賓之域

已上殿
中監

職官部

省

唐沈佺期自考功員外授給事中詩 南省推丹地東曹

拜瑣闈惠移雙管筆恩降五時衣出入宜真選遭逢每濫
飛器慙公理拙才謝子雲微案牘遺常禮朋僚隔等威
上台行揖讓中禁動光暉旭日千門起初春八舍歸贈
蘭闈宿昔談樹隱芳菲何幸鹽梅處唯憂對問機省躬
知任重寧止冒榮非

王維酬郭給事詩 洞門高閣靄餘暉桃李陰陰柳絮

飛禁裏踈鐘官舍晚省中啼鳥吏人稀晨搖玉珮趨金

殺夕奉天書拜環闈強欲從君無那老将因卧病解朝衣

杜牧李給事詩 一章緘拜皂囊中慄慄朝廷有古風

元禮去歸緱氏學江充來見犬臺宮紛紜白簡驚千古

鐵鎖朱殷幾一空曲突徙薪人不會海邊今作釣魚翁

杜牧寄宣州鄭諫議詩 大夫官重鎮江東瀟灑名儒

振古風文石階前辭聖主碧雲天外作冥鴻五言寧謝

顏光祿百歲須齊衛武公再拜宜爲丈人行過庭交分

有誰同

鄭谷賀新除左省韋拾遺詩 初昇諫署是真仙浪透

桃花十五年垂白郎官居坐末着緋人吏立階前百僚
班定趨丹陛兩腋風清上碧天從此追飛何處去金鸞
殿與玉堂連

黃滔寄獻梓桐山侯侍郎詩 漢宮行廟畧簪笏落人

間直道三湘水高情四皓山賜衣僧脫去表奏主批還
地得松蘿塢泉通雨雪灣東門添故事南省缺新班片

石秋從露幽窻夜不闌夢餘蟾隱映吟罷烏綿蠻可惜
相如作當時事悉閒

方干茅山贈高拾遺詩 聖代諫臣停諫舌求還故里
傲雲霞溪頭講樹遺漁艇篋裏朝衣盡酒家但愛身閒
辭祿俸那嫌歲計在桑麻我來幸與諸生異問答時容
近絳紗

又獻王大夫詩 高情不與俗人知恥學諸生取桂枝
荀宋五言行世早巢由三詔出溪遲操心已在精微域

落筆皆成典誥詞一鴉難成燕雀伍非熊本是帝王師
賢臣雖蘊經邦術明主終無諫獵時莫道百僚憂禮絕
兼聞七郡怕天移直緣材力頭頭瞻專彼文星步步隨
不信重言通造化須臾便可變榮衰

唐元稹授裴向左散騎常侍制 縉紳之徒言其閨門
之行僅至於衣無常主兒無常父矣推是爲政仁何遠
乎是以發自王畿至於陝服多歷年所終無尤違每移
孝友之風以懲強暴之俗甘棠之下廉讓興焉予欲用

垂璫夾乘之官以代吾盤孟韋弦之戒不亦可乎

白居易授歸登右散騎常侍制 朴忠沈厚心無適莫

介圭不飾止水無波

薛廷珪授李澥右散騎常侍制 清明照物以忘疲澹

泊居貞而有守來司綸誥潤色推工去卧雲山含章見
譽增重價誠由於合櫃固深根頗異夫握苗久漏搜羅
幾爲遺逸昇之近署官以豐貂

蘇頲授于經野給事中制 理必中於繩墨才見推於

札翰中臺奉草已承更直之榮左曹顧問宜接雙遊之美

又授李懷讓給事中制 絲綸所屬常推起草之能
正是司更接遊蘭之寵

崔嘏授崔疇等給事中制 玉在涅而不緇金投火而
彌勁眷言久次是用遷昇我有絲綸期汝論駁我有金
石資爾諧和無忝官常自貽公讓

李德裕授元誨諫議大夫制 往在內庭嘗感先顧奮

發忠懇不私形骸伏俯青蒲至於雪涕數共工之罪不
蔽堯聰辨垣平之詐益彰文德近因旌別邪正宰弼上
言以魯公藏器莫如寘革於左右漢后輯檻孰若列雲
於公卿是用命爾登於文陛其副我寵擢不替初心勿
沽小名以枉大節

崔嘏授李方等右諫議大夫制 爾等皆擢秀瑤林飛
華桂苑早登俊造共許清貞入憲府而自竦孤標歷文
昌而更光列宿分符茂績遠繼於龔黃視草雄詞舊推

於賈馬是用擢居右省陟彼首曹爾宜徵五諫之司佐
三銓之任

蘇頲授梁升卿等拾遺制 爰廣獻書之路用開納諫
之門不獨美於雕龍頗思齊於市駿

陳徐陵讓散騎常侍表 臣聞五十知命宗師之格言
六百辭滿通賢之高槩昔墨子諸生褰裳求楚魯連隱
士高論却秦况乎謬蒙知己寧無感激洪私過誤寘以
通班司憲文昌遂諧常伯今者昆吾小器諦視不見玄

黃鈞天並奏靜聽能聞鐘鼓雖神農分藥岐伯提針冥
衆因緣難可匡救陛下嗣臨寶歷光闡大猷屬意銓衡
留情標棧燕臺裝玉儻不精真齊客吹竽諒宜澄簡南
郊奉乘當求鄭默之才西省文辭應用羅舍之學

宋張舜民謝諫議大夫表 方安謫籍忽對鋒車入瞻八
彩之秀毫進與七人之上列竊聞明主臨政而願治先
王爲官而擇人號曰梓材取其器使若夫諫爭之任政
惟待從之人地密而選清秩卑而望重其所以起居言

動則與史官相表裏其所以彈訶風察則與臺憲同戚
休始則專弼人主之違今乃泛論天下之事乃者藥石
不進鳧雁僅存仗馬一鳴茅茹不已豈無大明之東出
廓然睨雪之曰消 敢望桑榆之晚景獲依日月之末
光招魂於楚水之涯拭目於雲臺之表手遮西日口誦
離騷齒髮摧頽謾索太倉之米衣裳顛倒驚聞長樂之
鐘 敢不激昂暮氣緝理空文乘白馬而伏青蒲試圖
來效餓西山而蹈東海期免後艱

蘇軾賀楊龍圖啟

方今朝廷之上號爲無諱而太平

之美終不能全臺諫之列歲不乏人而衆弊之原猶或未去豈聽之者徒能容而不能用言之者但爲名而不爲功歷觀古人之効忠皆因當世而用智不務過直期於必行右尹子革因典墳而道祈招之詩左師觸龍語饘粥而及長安之質徒盡拳拳之意不求赫赫之名此仁人及物之休功忠臣愛君之至分方傾耳以聽願續書諫苑之篇若有待而言或能著爭臣之論

宋翰苑新書賀鄭正言除司諫啟 孤忠上簡於龍光
清貴亟躋於鷺序冠峩豸角陰見睨而已消手批龍鱗
木從繩而自直

劉克莊賀湯司諫啟 鄭公所上百奏莫不切心陸
生所著一篇必蒙稱善後宮敬憚於質肅貴璫欲避於
淳夫乃冠伏蒲之清班以旌折檻之直氣有若仲山甫
補袞方嘉賴之欲如种明逸之拂衣胡可得已行陟大
坡之峻徑齊兩地之尊

王邁賀給事鄭帥啟

方鼠穴權門趨者成市而螭坳

直筆屹然如山及調更化之絃時方多事獨銜出疆之壁
義不辭難入還班行進掌封駁誰不批勅鮮有如何鄭
之力爭因此結知故每見殷浩而輒喜居中未久丐外
即行國事日新比貞觀初年而何若君子一去覺貞元
朝士之無多心戀闕以常丹髮憂邊而漸白惟有甘棠
之蔽芾遠到海頭最宜叢桂之婆娑久留春脚驢聲無
地可著最課爲天簡知太史夜占喜長沙之星見行人朝

發趨衡嶽之雲開寶閣陞大學士之班輕車奉太夫人
之養衆皆爭先而稱賀僕知大用之有階蓋當夷夏消
長之交未決和戰依違之策春秋復讎之義大乃素學
之欲行英俊在朝則本強正善類之所屬有以中書何
無寇公爲問者當以吾國即相司馬而答之初立本奇
更好黃花之晚節倘來不計直垂汗竹之芳名

蔡襄賀梁給事中啟 湊風雲之佳會躡霄漢之清
躔騫騰夕拜之遷傾倒辰猷之告封詞頭而不下舊傳

解事舍人之名批救尾以復歸共觀儒者給事之效惟
出令毋嫌於反汗則論議咸歎於回天仁人之利溥哉
君子之道長矣可速則速寧論諸公袞袞之升當言必
言要爲一士諤諤之益日三接而甚寵歲九遷而可量
起海濱而擢賢良已兆封侯之業游都城而取卿相方
歆稽古之榮某刺首吏韉託身德寓悵阻光儀之久欣
聞寵渥之新鵬兩翼之垂天孰測南溟之運鳳九苞而
瑞世但快朝陽之鳴歲律崢嶸禁途密勿願精鼎食亟

副巖瞻

改補闕拾遺爲司諫正言

渙寵龍墀地聯八舍升華

騎省奏劾千官用銷落膽之姦毀麻僂直競壯啟心之
論納牖陳詞鸞禁星沈見皂囊之凝露螭頭日永驚白
簡之飛霜寵榮異於往時責任愈隆於舊日蓋將令
引裾折檻之士得奮發於功名故不愛我冠珥筆之階
以寵致乎豪傑誠英主轉圜之舉而忠臣補牘之秋



古儷府卷六